

東
華
續
錄

東華續錄

同治八十八

臣王先謙敬編

臣張式恭恭校

閏十月丁卯諭軍機大臣等前據穆圖善等奏賊匪竄擾平番一帶當經諭令豫師督率該處文武妥籌布置茲據豫師奏稱整頓新軍籌備後路軍功何得彪督帶練勇在塘坊沙溝等處疊次擊賊茂勝即著飭令將此路賊匪實力剿洗毋令蔓延豫師見擬於大里壩等處分築堡寨與大寺連城等處聯絡聲勢即著督催各該地方官趕緊辦理招農開墾一面疏通運道以利軍行豫師見紮平番著將該處防守事宜布置妥協即行相機前進馳赴本任毋稍稽延將此由五百里諭令知之○諭張廷岳等奏竄匪逼近烏城請撥官兵會剿一摺張廷岳等據東兩部落盟長轉報福濟

札文內稱十月初六七等日賊匪萬餘復聚額爾德呢班第達呼圖克圖遊牧之博提哈拉烏蘇庫努克等處傷害多人肆行搶奪該匪尙有二股分擾烏里雅蘇台庫倫地方其推河烏勒幹庫努克盤踞之賊人數尤眾沙爾噶勒珠特台亦有匪踞道路梗塞等語福濟札文所稱情形尙未據該將軍奏報是否因臺站被阻未能迅速遞到著福濟榮全錦丕勒多爾濟將見在賊竄何處賊數若干及剿辦情形趕緊馳奏張廷岳等以蒙兵不能得力請飭綏遠城將軍察哈爾都統派撥馬步官兵由賽爾烏蘇臺站前赴烏境會剿前據福濟等奏已咨張家口綏遠城將前次備調馬隊催赴哈爾足敦一帶當諭令定安文盛卽將前項馬隊一千名分別檄飭達爾濟管帶前往嗣據張廷岳等請添派綏城官兵赴烏會剿又諭令定安將是否可以調撥酌度情形奏明辦理此時蒙兵

防剿甚不足恃亦係實在情形綏遠城察哈爾能否添撥官兵會
剿之處著定安文盛權衡緩急酌量辦理一面星速奏聞賊股奔
竄靡定著福濟榮全錦丕勒多爾濟張廷岳阿爾塔什達懷遵前
旨督飭派出各隊確探賊蹤會同兜剿毋得彼此推諉任令賊勢
蔓延並著福濟榮全錦丕勒多爾濟張廷岳阿爾塔什達等將賊
匪見竄處所及臺站相距道里若干喀爾喀四部落各旗遊牧地
方何處扼要何處應令設防各繪細圖貼說詳悉奏聞將此由六
百里各諭令知之○己巳諭軍機大臣等張廷岳等奏烏城戒嚴
情形緊急請飭撥兵來庫以資防守一摺據稱十月二十六日接
准福濟遺員遞到夾板摺匣一件當即發交臺站馳遞一面傳訊
該差梅倫博羅據稱烏城賊氛逼近臺站不通該差起身之日福
濟與榮全會督蒙兵二百餘名在城防守錦丕勒多爾濟督帶索

倫蒙漢各兵五百五十名駐紮頭臺豫備迎擊其時竄匪三千餘名已抵舒勒克二臺見在烏城情形不知若何等語前據張廷岳奏賊匪萬餘竄近烏境勢甚猖獗當經諭令定安文盛等酌量撥兵星速馳奏茲覽張廷岳等所奏各情是賊勢漸偏漸緊而烏城兵力單弱戰守均不足恃脫有不虞則科布多等處均形震動卽庫倫亦恐孤立無援必須迅撥勁旅以捍疆圉著李鴻章調撥宣化鎮標槍火槍等項官兵一千名派委得力將弁管帶迅速出口由賽爾烏蘇直抵哲林臺站北接庫倫所屬額爾德呢招等四處協同拒堵力保庫倫西境其達爾濟所帶馬隊一千名卽著定安文盛懍遵疊次諭旨催令迅速起程前赴烏城會剿毋稍遲緩並著於綏遠城察哈爾兩處各調得力官兵遴員管帶飭令趕緊赴烏爲達爾濟接應不得以無兵可撥爲詞一奏塞責福濟等於

援兵未到之時務當督率在防兵弁實力堵剿並將見在情形隨時馳奏張廷岳等亦當確探賊情妥籌防守不得稍涉大意此次匪眾突如其來究從何處竄近烏城著福濟張廷岳等確探具奏一面檄飭附近各蒙古部落官兵派隊截剿迅掃逆氛張廷岳前次奏撥餉銀五萬兩業經諭令何璟於京餉內劃撥著該撫迅速籌解毋再稽延張廷岳本日摺報係十月二十七日所發而二十六日轉遞福濟摺匣至今未到是否遺失卽著張廷岳等行文沿途臺站查明具奏本日諭旨除分寄福濟外著軍機處另錄一分遞交張廷岳派員齎送烏城交福濟等祇遵以免遲誤張廷岳所需礮位已諭令火器營催解矣將此由六百里各諭令知之○撥部庫銀十萬兩充庫倫軍需○庚午諭軍機大臣等劉崐奏剿辦會匪已漸肅清並續起股匪登時撲滅見仍派兵搜捕伏莽一摺

湘潭等處會匪見經劉崐派兵圍剿將首要各逆擒獲正法其脅從人眾均已解散湘潭各境漸就肅清其湘鄉道州續起股匪亦經該地方官等督兵剿擊登時撲滅見仍搜捕餘匪卽著李瀚章劉崐飭令李光燦會同衡永鎮道將逃匿餘匪悉數殲除務絕根株毋畱後患一面檄飭黃敎鎔等會同地方官認真整頓鄉團清查戶口如有逆目遁回潛伏者立即擒拏嚴辦毋任漏網聞兩湖地方勇丁遣散者結會甚多該督撫務當督飭地方官嚴行查禁有犯必懲以期消患未萌將此由四百里各諭令知之○詔緩修熱河園庭○辛未諭軍機大臣等金順奏官軍圍攻賊寨疊獲勝仗並後路防兵截剿竄匪情形一摺王家疿賊匪疊據金順奏報官軍進逼濠寨賊勢窮蹙此次所報十月十四至十九等日剿賊情形不過敷衍勝仗意圖塞責且此次官兵受傷甚多該逆仍未

大受懲創賊巢何日克復卽著金順振刷精神督率兵勇會同張曜各軍迅將王家疿賊巢攻拔並將該逆援賊實力堵剿毋令勾結致稽時日儻再事遷延日久無功恐該署將軍不能當此重咎也將此由五百里諭令知之○諭福濟等奏竄匪欲犯烏庫請飭撥兵援應定安奏歸綏官兵無可調撥各一摺福濟等所稱賊匪屯踞博克多山推河口額爾德呢招等處圍撲烏里雅蘇台庫倫十月初九日逆賊已抵第十一烏特臺驛卒逃避文報不通等語與張廷岳等前奏大略相同烏庫兩城關繫極爲緊要錦丕勒多爾濟見已親帶兵勇起程馳赴第三臺特默爾圖擇要防堵著福濟榮全與該參贊悉心會商先就見有兵力覘賊所向相機進剿毋任匪勢蔓延棍噶扎勒參剿賊尙能出力見旣願效馳驅卽著令其揀選精壯千名星速赴烏協同防剿福濟等以賊眾兵單不

敷分布檄催前調之察哈爾馬隊星速前進並擬添調綏遠城烏槍隊一千名東三省馬隊一千名哈密巴里坤滿綠營兵勇各一千名前往協剿昨據張廷岳等奏竄匪逼近烏城請撥兵會剿當將綏遠城察哈爾能否撥兵前往諭令定安文盛酌量辦理本日復據定安奏歸綏軍務緊要官兵無可分撥惟烏城竄匪滋擾勢甚披猖非厚集勁旅不足以資堵剿著定安先其所急酌量分撥槍隊暨東三省馬隊赴烏協助前調察哈爾馬隊一千名著文盛催令達爾濟管帶迅速啟行兼程前進並能否再行添撥速籌具奏哈密巴里坤兩處兵本不多著文麟景廉伊勒屯何瑄酌量調撥星馳策應以上各軍均歸福濟調遣卽由推河敖羅蓋一帶前進迎頭截擊迅掃逆氛惟各軍雲集統帶需員卽著榮全統率各軍扼要駐紮妥籌防剿並著福濟等一面飛催圖庫爾剋日到烏

協同勦辦福濟等請撥餉銀五十萬兩已諭令戶部速議具奏該部籌撥之款批解需時深恐緩不濟急張廷岳等前撥銀十萬兩著於解到時先行分撥烏城俾資接濟毋得稍令畛域該匪既有分撲庫倫之意張廷岳等務當加意偵探實力嚴防毋稍疏懈將此由六百里諭知定安福濟榮全錦丕勒多爾濟文盛張廷岳阿爾塔什達文麟景廉伊勒屯並傳諭何瑄知之○壬申于浙江殉難同知費保鏞縣丞沈福年等建祠○癸酉飭戶部籌撥銀五萬兩濟烏里雅蘇台軍餉○諭成祿督兵關外嚴防竄匪○予安徽殉難訓導潘俊祭葬世職○乙亥諭軍機大臣等劉嶽昭岑毓英奏官軍攻克永北等廳州城地方一律肅清見籌進勦一摺永北鶴慶鎮南三城見經克復大理賊勢已孤亟應乘勝進攻迅殲醜類卽著劉嶽昭岑毓英飭令李維述等各率所部兵勇迅速前進

將大理府城及賊踞處所以次剋期攻拔毋稍遲緩已復各城務當慎選廉能之吏將善後事宜妥爲經理一面斟酌情形派兵駐守以期保衛地方將此由六百里各諭令知之○諭錦丕勒多爾濟奏匪陷烏城並請飭撥餉銀文盛等奏催調馬隊赴烏會剿並請飭直隸山西發給征兵餉乾各摺片賊匪四千餘人於十月十九日撲犯烏里雅蘇台官兵未能抵禦旋即失陷覽奏實深憤懣所有在城各員下落著錦丕勒多爾濟查明具奏逆匪見在盤踞附城遊牧地方亟應厚集兵力迅籌剿辦前調察哈爾馬隊一千名著文盛等飭令達爾濟剋日管帶啟行不准稍有遲誤其備調官兵五百名卽著飭赴什巴爾泰博羅柴濟地方聽候調遣定安仍遵前旨於綏遠城槍隊暨東三省馬隊酌量分撥赴烏助剿本日諭劉銘傳趕緊赴陝將陝省北路邊內邊外各要隘派兵扼紮

以便該將軍騰出兵力續行撥兵赴烏援剿著定安斟酌辦理前令都與阿等將古北口撤回馬隊截留二千名取道張家口赴援烏城著卽飭令迅速前進毋稍遷延惟所調各軍須有大員統率方能調度合宜杜嘎爾向來帶兵頗能得力著卽統帶察哈爾馬隊先行前進其綏遠城及吉林黑龍江調到官兵均著歸該副都統統帶赴烏相機調遣前調宣化大同兩鎮官兵各一千名前赴庫倫防剿見在烏城旣失庫倫情形亦屬喫重著李鴻章何璟迅卽調派剋期前往該官兵經由軍臺行走應需餉乾等項並著寬爲籌給令其行備辦餼糧裹帶前進需用鍋帳等項一併備齊以免沿途缺乏直隸山西北境並著李鴻章何璟確切偵探先事豫籌毋稍大意巴里坤哈密兩處兵雖不多惟烏城若被久踞則關外各城愈形孤立著文麟景廉伊勒屯何琯酌撥得力官兵星

馳赴烏以資策應錦丕勒多爾濟此次未能攔截賊匪姑念兵力較單免其置議該參贊見在退離數臺駐紮著卽調集蒙古官兵奮力進剿迅圖克復以贖前愆此股賊匪究從何來見在賊勢若何並著迅速奏聞棍噶扎勒參既願帶兵剿賊並著催令前來協同夾剿以資得力錦丕勒多爾濟已咨庫倫先行協解餉銀五千兩並請飭部再撥銀二萬兩著張廷岳於戶部前撥銀十萬兩內解到時撥給銀二萬五千兩應用如有不敷並著先其所急寬爲接濟福濟前請撥銀五十萬兩已據戶部覆奏由部庫撥銀二十萬兩山東山西河南各撥銀十萬兩臺站如有阻隔前諭解至庫倫由張廷岳等派員協解此項銀兩如到庫倫卽著趕緊解往並將解撥之銀扣還以清款項文盛等請將茶馬釐捐銀三萬餘兩歸入軍需項下支放兵餉著照所議辦理將此由六百里加緊諭

知都興阿德英定安李鴻章奕榕毓福文盛杜嘎爾何璟錦丕勒
多爾濟張廷岳阿爾塔什達文麟景廉伊勒屯並傳諭何琯知之
○諭本日據錦丕勒多爾濟奏烏里雅蘇台賊勢猖獗於十月十
九日竄陷烏城該逆見踞臨城遊牧地方兵力甚單遽難攻克等
語該城將軍福濟參贊大臣榮全尙無下落情形極爲危急亟須
厚集官軍以資攻剿劉銘傳見在行抵何處著卽統率所部兼程
前進星速赴陝於該省北路邊內邊外各要隘分撥兵勇嚴密布
置俾定安無後顧之虞庶該將軍或可騰出兵力派赴烏城迅籌
援剿以殄寇氛將此由六百里諭令知之○詔各省書局刊明儒
西坤實政錄以資吏治○丙子諭曾國藩等籌議河運章程○永
定河漫口合龍○予陝西陣亡提督劉松山於榆林建祠總兵官
文星明等附祀○以張之萬爲江蘇巡撫張兆棟爲漕運總督恩

勅爲江蘇布政使

由奉天府尹遷

○丁丑諭軍機大臣等張廷岳等奏

烏城被陷庫倫防剿喫緊請飭催援兵一摺庫倫與烏城本有犄角之勢烏城既爲賊陷則庫倫孤立無援必須厚集兵力以資防剿前調宣化大同兩鎮官兵各一千名前赴庫倫卽著李鴻章何璟迅卽調派並爲寬籌餉乾催令剋期前進交張廷岳等調度毋相稽遲並將該官兵起程日期奏聞前調達爾濟馬隊一千名並古北口撤回吉林黑龍江馬隊二千名及綏遠城槍隊東三省馬隊均交杜嘎爾統帶赴烏助剿見在庫倫需兵孔殷以上各軍馳抵邊外如賽爾烏蘇等處應否酌撥若干畱庫助剿著張廷岳等與錦丕勒多爾濟斟酌軍情妥籌調遣此時察哈爾綏遠城所調各兵想定安文盛等於接奉前旨後必已迅速調派卽著催齊各軍由杜嘎爾統帶星馳前進不得稍涉遷延錦丕勒多爾濟退離

數臺駐紮日來蒙古官兵能否調集棍噶扎勒參已否帶兵前來
見在賊勢若何並著隨時具奏文麟景廉伊勒屯何瑄仍著懷遵
前旨酌撥得力官兵赴烏策應張廷岳等見擬設措銀兩解交錦
丕勒多爾濟以應要需尙屬力顧大局著照所請辦理俟山西餉
銀解到再行如數歸還部撥烏庫餉銀已諭順天府迅卽起解惟
恐到尙需時文盛前請將茶馬釐捐銀三萬餘兩歸入軍需項下
支放兵餉已允其請著卽於此款內先撥一二萬解赴庫倫應用
俟部餉到後卽行劃抵科布多逼近賊氛據張廷岳等片稱巴爾
噶克厄魯特已勾結賊匪意圖分窺科城防務緊要奎昌文碩務
當嚴密遏堵毋稍疏虞棍噶扎勒參見在何處並著奎昌等催令
剋日赴烏剿賊邊外賊勢猖獗臺站梗阻定安文盛等總當多發
偵探務得賊情隨時具奏巴爾噶克厄魯特有通匪之說著張廷

岳阿爾塔什達錦丕勒多爾濟檄飭扎薩克圖汗撫諭各部落隨同官兵實力剿防以安反側庫倫情形喫緊著錦丕勒多爾濟會同棍噶扎勒參將由烏竄庫倫並恰克圖兩道扼要堵禦毋任東竄張廷岳於各路官兵未到以前務就見有兵力嚴密布置並發連環偵探隨時奏聞將此由六百里諭知李鴻章定安文盛杜嘎爾何璟錦丕勒多爾濟張廷岳阿爾塔什達奎昌文碩文麟景廉伊勒屯並傳諭何瑄知之○戊寅諭內閣蘇鳳文奏官軍由越南凱撤入關一摺廣西逆匪吳亞終等由太平竄擾越南經廣西提督馮子材親統大軍馳往剿辦當將首要各逆殲除淨盡並於河陽地方搜剔逸匪越南境內一律肅清該提督業已於本年七月間振旅入關其所帶勇丁亦經分別撤留妥爲安置廣西提督馮子材督軍剿辦將此股賊匪悉數蕩平實屬調度有方深堪嘉尚

馮子材前已賞給騎都尉世職著加恩再賞一雲騎尉世職以示優獎○諭軍機大臣等蘇鳳文奏官軍凱撤入關並酌擬善後章程開單呈覽暨提督卻還越南犒師銀兩各摺片逆匪吳亞終等竄擾越南經馮子材督軍越勦將首要各逆悉數殲除越南國王餽送犒師銀兩該提督婉爲辭卻實屬深明大體馮子材見已凱撤入關所部勇丁分別撤留並挑撥各營分往各府辦理善後卽著蘇鳳文馮子材飭令各該地方官於此項勇丁到時妥爲鈴束如各府所屬尙有伏莽務當實力搜除毋畱餘孽廣西邊境如有應防處所並著斟酌辦理情形撥兵駐守保衛地方蘇鳳文所陳善後十三條尙有可採該撫卽率地方文武實力舉行不得徒託空言有名無實蘇鳳文俟善後事宜辦有頭緒著卽來京陛見將此由五百里各諭令知之○己卯諭軍機大臣等金順奏官軍勦

匪獲勝情形一摺王家疇日久未下通昌等堡踞回及南路馬家灘一帶竄匪時欲乘閒滋擾牽掣官軍見經金順會同張曜派撥兵勇分路剿擊已將南北兩路賊巢攻毀擒斬甚多餘逆一股亦被石青防軍擊敗即著金順飭令劉廷等迅將敗竄各匪悉數殲除毋令漏網一面會商張曜嚴檄前敵各營並黃金山一軍乘王家疇踞匪勢孤之時迅速進剿趕將賊寨剋期攻拔毋得遷延觀望日久無功該逆被剿窮蹙難保不伺隙竄出金順務當嚴密布置將此股賊匪就地鏟除以杜紛竄將此由五百里諭令知之○庚辰諭各省安插游勇整頓營制○癸未以烏城失陷命副都統成明帶神機營官兵一千七百名赴察哈爾防守○甲申諭軍機大臣等定安奏遵撥官兵赴烏會剿並陳歸綏軍務喫緊情形請飭劉銘傳撥兵扼紮纏金暨參帶兵侍衛各摺片烏城失陷後北

路需兵孔亟定安見派參領貢果爾統帶所部察哈爾馬隊二百五十名由達拉特旗星夜來綏馳赴哈爾尼敦推河一帶查探匪蹤相機截剿以蒙兵赴援蒙境自可得力且係杜嘎爾舊部兵將相習呼應較靈卽著該將軍催令迅速前進沿途探詢與察哈爾隊伍合兵一處歸杜嘎爾調遣以一事權至前調吉林黑龍江馬隊向歸副都統富勒琿統帶駐紮後套纏金一帶定安奏稱纏金爲諸軍糧運總匯之區此時磴口石背山一帶時有賊蹤陝回又有欲竄後套之信若遽將此軍撤動設該逆乘虛北竄不獨糧運梗阻卽包薩一帶亦必震動等語自係實在情形前有旨令劉銘傳撥兵扼紮北路要隘見在邊外望援甚亟不可不設法籌撥著劉銘傳迅派大支勁旅由靖邊安邊一帶取道甯條梁馳赴纏金扼要屯紮以保糧源定安俟劉銘傳派兵到後卽飭富勒琿統帶

所部馬隊一千二百名取道烏喇特旗馳赴烏境助剿綏遠至烏城道里若干有無臺站並繞道處所著定安迅卽查明詳晰具奏並繪圖呈覽錦丕勒多爾濟於援兵未到以前務當督率蒙兵妥籌防剿仍將賊勢軍情隨時馳奏侍衛福全管帶神機營馬隊寬嚴失當不洽眾情不得因尙無劣蹟稍事姑容著撤去管帶官並撤銷二品頂帶飭令回京當差以示懲儆將此由六百里各諭令知之○諭曾璧光奏提督赴任分別籌辦軍務一摺提督周達武接辦援黔軍務曾璧光擬俟該提督到黔接印後卽令馳赴下游與席寶田籌商機宜或進規凱里或由重安南渡以收夾擊之效酌派提督林從太管帶兵練二千接防貴定總兵何雄輝帶領所部由定番出剿期與劉士奇等軍分規都勻八寨所籌均尙妥協卽著崇實吳棠催令周達武剋期馳赴本任接辦下游軍務會同

楚省各營將梗化逆苗次第掃除以靖疆圉曾璧光此次所陳慮及下游各屬意見參差所見亦是著照所請周達武著幫同曾璧光辦理軍務該提督所帶原部兵勇及將來酌畱唐炯等營文武各官卽由周達武咨明崇實吳棠查覈奏報其林從太等防剿各營係屬黔省自募之軍其營制餉需卽照曾璧光所議仍按該省舊章辦理該撫惟當力籌接濟毋令缺乏並檄令聯絡川楚援軍通力合作以壯聲勢經此次布置後崇實吳棠劉崐曾璧光務當分飭各營妥爲防剿以竟全功毋再如前觀望致滋貽誤唐炯前致席寶田函內有川中月協黔餉五萬歸黔自辦聞黔中意甚欣然等語曾璧光謂當時並無此意唐炯之言因何而來必須各還根據著崇實吳棠飭令唐炯明白登復卽行查覈具奏以懲虛誣嗣後該將軍督撫等總當力顧大局不得惑於浮言致軍務稍涉

奏勁將此由五百里各諭令知之○諭文盛杜嘎爾奏遵飭察哈爾馬隊赴烏協勒杜嘎爾奏催齊各軍統帶前進張廷岳奏請飭催宣化大同官兵各一摺據文盛等奏稱察哈爾右翼馬隊五百名飭令達爾濟管帶先行起程左翼馬隊五百名接續進發並籌備駝隻等項俾利軍行所籌均尙周到著卽飭達爾濟管帶該官兵剋日啟行相機進剿毋稍稽遲前疊諭都興阿等截畱吉林黑龍江馬隊二千名歸杜嘎爾統帶何時可以到口著杜嘎爾迅催此項官兵到齊卽行統帶前進刻下天氣嚴寒軍士遠道出征朝廷深爲廛念該副都統務當妥爲拊循勉以忠義沿途經過地方尤應認真約束毋任滋事庫倫需兵甚急前諭李鴻章飭王可陞管帶宣化練軍一千名前往庫倫協同防剿著該督飭令星速拔隊前行所調大同鎮兵一千名著何璟懍遵疊次諭旨迅卽調撥

派委得力將弁管帶馳赴庫倫官兵早到一日人心早安一日不可稍涉延緩致誤戎機此項官兵到口時每起分撥二百名閒日出口以期臺站應付一切較爲便捷此次先移調撥官兵五千名需用駝隻甚多文盛等擬由商都等處調撥外由錫林郭勒十旗每旗借用駝三百隻著理藩院飛飭錫林郭勒盟長會同該都統等委員妥爲辦理趕緊撥解以應要需馬隊臨敵衝鋒全賴得力馬匹著張廷岳阿爾塔什達轉飭喀爾喀等部落速撥騰壯馬三千匹先期解交庫倫妥爲收放以便官兵到時應用藉資進剿惟喀爾喀等部所撥馬匹恐難如數著文盛於各馬羣內仍當寬爲籌備以利遄行近日烏城賊情若何張廷岳等隨時探明奏聞並著將籌辦情形知照錦丕勒多爾濟以壯聲援至大軍進剿兵食最關緊要口外均非產糧之區自應在察哈爾安設糧臺以資轉

運惟該衙門差委之員著李鴻章卽飭口北道酌派委員赴口設立糧臺所有征兵糧餉並採辦乾餒及需用軍火等項責成派出之員專司其應需銀兩並著李鴻章籌款撥給奏明辦理將此諭知理藩院並由六百里諭令李鴻章文盛杜嘎爾何璟張廷岳阿爾塔什達知之○撥部庫銀二十萬兩備察哈爾軍需○丁亥諭軍機大臣等蔣志章奏草地逆回竄入陝境兜剿獲勝見調官軍力顧河防劉銘傳奏迅速赴陝並渡黃情形各一摺懷遠逆回竄擾三道河等處經提督成鏡春等疊次擊敗其靖邊一股聞我軍獲勝卽由貓兒灣陳里川逸去該逆復由懷遠後山竄至綏德之吳家山分擾清澗安定等處官軍截擊疊有斬擒著蔣志章督飭各軍實力搜捕將此股賊匪殲除淨盡務絕根株吳堡清澗延川延長宜川一帶濱近黃河見在冰橋凝沍處處可通亟應防賊僞

渡而宜川之龍王迪尤關緊要蔣志章卽檄飭王名滔等嚴密布
置防剿兼施以扼該逆竄晉之路何璟見已出省履勘河防著卽
督飭在防各軍認真守禦毋令該匪闖入晉疆定安務於沿河一
帶勤加偵探遇有東竄之賊卽派兵會合攔剿迅掃逆氛昨諭劉
銘傳迅派大支勁旅由靖邊安邊一帶取道甯條梁馳赴纏金扼
紮卽著該提督兼程赴陝速行派隊扼守纏金以保糧源其餘邊
內邊外各要隘並著統籌全局擇要布置毋稍疏虞將此由五百
里各諭令知之○撥部庫銀六萬兩備神機營餉需○召李瀚章
入覲以郭柏蔭兼署湖廣總督由湖北巡撫署○已丑左宗棠奏十月初
五日官軍會破漢伯堡後是日金積堡逆回見西面各軍出隊以
爲營壘空虛午刻突出步賊千餘直撲長圍經提督閻定邦總兵
趙興隆督隊擊之斃賊數十名賊仍敗退我軍傷亡二十餘名雷

正綰等會議漢伯西南數里張家泉金家堡地方尙存團莊兩所
每所守賊不過數百名因會商湘軍收隊回營使賊不疑初七日
黎明雷正綰等各帶馬步隊往攻派馬隊扼要以備鈔殺賊不虞
官軍復至倉卒閉門不及陳天壽郎永清等揮隊分起衝殺而入
賊眾紛紛亂竄馬隊馳出圍之登時將兩莊守賊七八百名斬馘
淨盡無一脫者我軍傷亡十餘名次日收隊而返劉錦棠金運昌
雷正綰黃鼎徐文秀會商楊明王洪兩堡對峙金積迤東五十里
閒緊扼靈州西南要路楊王兩逆雖經挫斬黨類猶多各寨漏網
殘回皆恃此藏身我軍糧運均須隊伍護接殊多牽制之慮商定
合力進攻十一日夜四鼓各率馬隊前進十二日辰刻齊集楊明
堡外見該堡甃牆甚高周圍約四里許雷正綰黃鼎紮於東面以
備王洪堡之援金運昌徐文秀紮於西南兩面以杜堡賊外竄王

衍慶運後膛洋礮及各開花礮列於東北劉錦棠督大隊護之既成列各督丁揮鋤修壘堡賊依濠列隊見官軍勢盛未敢撓鋒而後膛礮數響之間即衝塌垛牆丈許賊眾驚懼縮入堡中時已薄暮各軍令步兵稍休各派哨馬巡邏防賊夜遁十三日辰後王洪堡賊以馬步千餘來援雷正綰黃鼎分兩路齊進槍礮連環刀矛並舉殺賊二百餘名賊敗退追三里許而還王衍慶一面施放大礮轟擊堡牆劉錦棠金運昌徐文秀各督隊放騾絲礮田雞礮霎時煙燄漫天衝塌附寨礮臺一座並寨牆五丈餘各軍奮撲壕邊攀援直上堡賊甌石紛下壯士受傷登而復墜者數百名迄不得上乃晝夜分伏壕中避之二更後堡賊放火焚巢突圍而出官軍伏起斬賊目楊洪開楊十五於壕旁並殲悍賊約二三百其衝過壕溝者各軍馬步隊四面遮截刀砍矛刺無一漏網堡中老弱婦

女概赴火自焚軍械器物悉成灰燼惟拾獲焦麥數十石而已十三日各軍將寨牆毀平會商乘勝於次日進攻王洪堡十四日率隊進抵王洪堡見堡牆堅厚遠過楊明以大礮試攻不能洞入遂各收隊而返臣接涼州報援賊大股北趨鎮番將由草地東竄料其爲援金積而來也飛函前敵各軍豫爲之備劉錦棠黃鼎會商馬家河灘各堡居大河中洲如援賊速至必將勾引援賊踞爲老巢與金積堡賊相爲犄角官軍僅鎖圍壕塹橫貫其中難期穩固不如先攻馬家河灘各堡使援賊失所憑依乃易得手見據黃鼎報十月二十一日調船渡師向馬家河灘進發二十四日各軍將馬家灘小堡攻克並將就近圍莊一律掃除殺賊甚夥尙餘兩大堡已力攻九晝夜尙未破也俟得續報及各軍詳細戰狀再行奏報又奏前奉 上諭據定安奏稱探得回逆二千餘騎竄至米脂

輒井堆子梁等處並有續來馬步賊千餘已到花定一帶河東陝
回復由通昌通貴河邊竄過馬步賊二三千人分擾平羅等處既
有賊蹤劉厚基成定康等軍何以不迎頭截擊平羅地方著左宗
棠迅派勁兵進紮以清甯靈後路等因欽此仰見 聖慈垂念邊
疆無微不至燭臣查九月間疊據延綏鎮總兵劉厚基呈稱據署波
羅營參將張隆昇署懷遠縣知縣史柏會稟稱馬步匪數百由草
地竄入懷遠附近村莊搶掠又據米懷接壤之馬胡峪麻地溝等
處寨民稟稱有游氛時至滋擾劉厚基當卽派總兵李作福向先
甲帶隊馳往兜擊並檄總兵田玉廣率帶衛營移紮距米三十里
鎮州堡就近接剿各有斬獲並據署延榆綏道成定康稟稱回逆
百餘竄至入懷遠屬之油坊頭當派提督成鏡春副將張永貴等
帶隊往剿斃回逆五六十名又有賊數百竄綏德之石灣當派提

督彭緒旂帶隊馳擊擒斬三十餘名據生擒賊供係於六七月內由金積各堡陸續竄出逃往草地東西奔走數月復竄內地覓食者又據報回逆二三百名竄至三道河李家灘等處又有五六百名竄至甌井堆子梁等處當派參將成必勝知縣馬黼臣等帶隊分起馳擊各有斬獲均經臣隨時批令確探嚴防相機追剿並檄知州龍錫慶率義勇副四營馳赴綏德一帶剿之旋據稟稱金積逆回被大軍痛剿勢極窮蹙時有零星小股由花定一帶下竄在瓦窯堡西北各州縣地方肆擾或二三百人一起或百數十人一起經該軍於綏德屬之宋家坪安定屬之新莊鎮等處疊獲小勝斬賊約二三百人亦經臣批令嚴加搜剿務期淨絕根株九十兩月前後據署綏德州知州楊吉雲署靖邊縣知縣梁以恭署安定縣知縣江匯川等稟稱帶隊剿賊時有斬獲所報賊數統計縱多

不過數百名十月以後花馬池定邊等處未據報賊蹤東竄是陝
西北山竄擾之賊實亦無多因其飄忽靡常故各處時有警報然
合計各處官軍奚止數倍於賊臣已飭成定康嚴飭所部各營旗
所轄各地方官飭限將餘氛兜剿埽除淨盡以靖邊圉大抵各州
縣各軍營於賊來則以少報多賊去則以多報少錮習牢不可破
至所稱探丁探役尤多捕風捉影之談不足爲據卽如春間陝回
初次回竄陝西人馬實不過二三千而陝西各州縣所報竟多至
數倍其明徵也仰蒙 聖慮周詳復派提督劉銘傳督辦陝西軍
務劉銘傳本淮軍名將韜略夙優自當遵旨迅派得力隊伍扼紮
陝甘交界處所足紓 聖主西顧之憂微臣與定安更可有恃無
恐矣至平羅地方距平涼千有餘里大河前橫聲息間隔河東陝
回竄過之說臣至今未有所聞大約卽九月十三夜竄出一股查

此股經劉錦棠等擊敗後逆首余彥祿受傷而斃其騎賊竄過河西聞已入河西王家疇賊巢卽金順張曜所報禹彥祿馬長順一起禹彥祿當卽余彥祿之訛然已伏誅矣其另一股由漢伯堡南竄經提督周紹濂署平慶涇道魏光燾屢次擊敗步賊實已無多逆首丁步月沙自元率騎賊數百與河州逆回及西山伏藏之靖遠會甯鹽茶廳各逆回會合南趨人馬約三四千之數將闌入張家川提督楊世俊等於隴城蓮花城大敗之此均金積未合鎖圍以前竄出者追金積鎖圍既合實無一賊竄出似陝回竄過平羅非指金積堡之陝回也惟臣前接署涼州鎮總兵王仁和呈錄賊供崔三禹得彥白彥虎等三逆由河州竄擾平番涼州後率其醜類直趨鎮番以地勢揣之可由草地犯平羅甯夏以圖解金積重圍而前敵各軍迄無報至或者賊之遲迴不前意在俟河冰合凍

併力南趨臣已飛告金順張曜豫爲之備並函知金積諸軍又奏
臣疊奉寄諭垂詢烏魯木齊提督成祿近日所辦情形據實具奏
臣維成祿駐軍高臺與臣相距甚遠向例烏魯木齊提督雖歸總
督節制而成祿署銜欽差總統西路軍務事無鉅細均由其陳奏
請旨卽應歸地方辦理事件亦不使督臣與聞外省奏事除密件
外拜發後卽將摺彙咨行各處俾彼此共知成祿則必俟奉到批
回後始鈔彙咨送其拜發摺件每咨臣代發馳驛傳牌而所奏何
事臣不知也故疊奉諭旨查詢臣無憑陳覆成祿所部聞多四川
陝西勇丁秦俗强悍古已云然自逆回構亂以來好勇尙氣之士
半就凋零兼之鴉片流毒漸染太深陝西與山西甘肅同一痼疾
此次軍興求驍桀於行列中百難得一更有何精壯勇丁堪以入
募西蜀當嘉慶年間名將輩出自頃啗嚙變成哥老會匪軍營傳

染殆徧雖勇辯之士尙自不乏然欲簡練用之非得好將領鈴束
難期實效卽如臣初入關時黃鼎以蜀人帶蜀勇正苦哥匪充斥
軍令難行具稟臣爲捕斬巨目數名乃始用命雷正綰此次復規
金積商請募蜀勇數營臣止勿募而以新募豫軍隸之可見蜀勇
亦非足恃也成祿堅求募川陝勇丁數千若不精選營哨之才恐
又蹈從前募川勇半途潰散故轍縱令安靜到營亦不能期其出
力可想而知成祿自稱該軍餉項積欠如許之多而復募川陝勇
丁十數營新餉又將安出石成器部勇索餉譁潰豈非前鑒此論
川陝勇之不可多募也就成祿一軍餉事言之所指各省協款向
歸該提督自行委員催取其多寡之數臣未與聞然未必有應手
巨款其所恃以爲糧者關外安敦玉三州縣京斗三萬石關內張
掖縣運省倉糧三千五百石撫彝通判運省倉糧二千石高臺縣

運省倉糧二千石以該軍勇數計之除營長礮夫外勇丁二千九百餘名除軍糧外贏糧甚多堪以變充軍餉况張掖縣撫彝通判高臺縣三處運省倉糧成祿均索取折價則又無須變價也成祿於徵糧外復照糧攤捐致張掖撫彝高臺三廳縣民人聚眾滋事幾釀異變經署甘州府知府祁之銓署撫彝廳通判王佳植彈壓勸諭乃止而民間盼其出關冀可永不辦捐臣得甘州府稟報後卽飭藩司崇保臬司崇福委新授西甯府知府鄧承偉前往查辦尙未接鄧承偉稟覆大抵成祿本無出關之志從前因詔旨嚴切不敢有違又思藉出關爲名可奪取運省倉糧以充軍餉迨因派捐苛急民情弗順勢難久駐高臺成祿亦不得不爲出關之行已據高臺縣稟八月二十二二十四二十六等日該軍前隊業已拔營西上餘暫留高臺未知接奉暫緩前進諭旨後進止如何耳實則

率二千餘兵勇出關不但旁觀者不以爲然卽成祿亦固心知其不可恃無如始迫於朝命不能不爲此請繼因復派捐糧幾至激變又不能不爲此行以見在情形言之該軍前隊如已出關似可併交景廉統領其畱高臺餘隊或仍由成祿帶赴肅州一帶擇地駐紮與署甘肅提督楊占鼐和衷共濟辦理屯田尙期穩妥楊占鼐成祿雖彼此各有意見而其圖藉撫局敷衍目前則如出一轍不敢齟齬也至金塔寺漢回構衅殺害署都司馬萬福一案據前署肅州知州李元嘉稟馬萬福本投誠回弁自署都司以來貪恣險戾無惡不作不但漢民恨之回亦恨之此次河西紅漢民聚眾圍署將其槍斃良回亦爲稱快臣見飭西甯府知府鄧承偉於委赴甘州之便就近前往察辦當易了結緣肅州一帶良回尙多易於開導此時若遽派隊前往翻起回民猜疑或致滋生事端上

諭軍機大臣等甘省中北兩路官軍自攻克漢伯堡後雷正綰等
接攻張家泉金家堡賊寨獲勝劉錦棠等復合力攻破楊明堡陣
斬賊目楊洪開等多名正擬進攻王洪適涼州大股賊匪繞竄圖
援金積恐馬家河灘各堡勾引援賊遂先將該處各小堡及附近
閑莊一律埽除尙有兩大堡未下仍當趕緊攻拔俾援賊失所憑
依勦辦方易得手金積見已合圍各處匪股乘隙來援總當加意
防範著左宗棠嚴飭前敵諸軍穩紮力攻以期埽穴擒渠毋稍鬆
懈並分檄各路將士扼要堵擊毋任援賊竄近牽我兵力前竄米
脂平羅股匪據左宗棠覆奏探報未確不足爲據金積合圍實無
一賊竄出十月以後花定等處未據報賊蹤東竄陝西北山竄賊
實亦無多等語近據蔣志章奏報草地逆回竄至綏德分擾清澗
安定等處是竄陝之賊見尙陸續踵至著卽飭令成定康等隨時

兜勦力遏狂氛平羅地方見雖無兵可撥如遇有緊要軍情該大臣仍當妥籌兼顧竄入河西之禹彥祿等一起左宗棠奏禹彥祿即係余彥祿之訛前已傷斃何以金順前後奏報王疇軍情尙有余彥祿在內著該大臣查明具奏左宗棠另片奏遵籌成祿出關事宜等語前因成祿已拔隊西行當諭該提督督軍駐紮關外不得輕率前進仍著成祿懍遵本月十一日諭旨擇要扼紮就近兼顧肅州該提督營餉積欠甚多且川陝各勇不能得力成祿著毋庸另募勇丁卽就見有兵力力加整飭與提督楊占鰲和衷其濟遇賊卽擊並辦理屯田事宜該軍口糧已准提用張掖等處運省倉糧成祿當體恤民艱不准再有勒索苛派等情致滋紛擾將此由六百里各諭令知之○諭金順奏北路防軍進剿踞匪暨陝回夜援王疇另股乘夜南竄官軍先後截勦獲勝一摺余逆馬賊回

賊通呂一帶提督劉廷等敗之於渠溝墮莊之賊復潛出糾合陝
匪並馬家灘遁出匪眾內外合撲官軍卡壘各軍迎擊擒斬多名
共竄踞王元橋迤東一股經托雲佈等擊散寨賊雖已勢蹙惟通
昌一帶踞匪仍時出逆援牽掣官軍並據擒賊供稱有欲赴中衛
阻擾河東各軍南路糧道等情亟應先行撲滅著金順會同張曜
督飭各軍迅將此股逆援掃蕩並嚴堵該逆來路以免內外勾結
王瞳一寨日久盤踞金順雖屢報勝仗而該逆負隅如故援賊亦
來往自如豈能卽行得手金順務當會同張曜激勵將士迅拔堅
巢毋再遷延貽誤至逆首禹彥祿本日據左宗棠奏報卽係余彥
祿前已傷斃是否卽係一人著查明具奏將此由六百里諭令知
之○左宗棠奏逆酋余彥祿餘黨從漢伯堡南竄一股馬步及逆
眷共二千餘擾及半角城李旺堡一帶經周紹濂魏光燾陳湜疊

戰獲勝步賊斬馘殆盡騎賊向會甯靜甯一帶亂竄臣前飭楊世俊李耀南豫於安定截之河州逆回馬阿渾等一股經楊世俊追剿獲勝已於十月二十日陳奏旋據各軍先後稟稱探得河州劉阿渾馬阿渾歸巢挑選悍黨併糾合前次石川山擊敗之賊馬步約二千餘由三家集渡洮出柳林溝一由大寨子渡渭而南一由站灘漫窪出好麥川而北十月十五日楊世俊等得報立率所部並督同安定防勇營官白高年帶隊出岷口截之黃昏馳抵該處賊正偷過我軍突出截賊兩段未過者向原路退敗已過者向岷口北原而奔官軍分起追擊各五六十里擒斬百餘名五更收隊仍還岷口勇丁偵探該逆潛伏山巖數日莫知其蹤地僻人稀無從問訊楊世俊等遂返馬營監以待之二十日該逆偷竄靜甯西南九十里之蔡家堡地方與余彥祿敗黨逆目丁步月沙自元等

合股沿途句結靖遠靜甯會甯等處零匪共三四千名駐靜甯州
總兵譙賞謙聞警飛率所部馳往剿之鏖戰兩日夜殺賊百餘名
斃一紅衣賊目生擒十餘名卒以賊眾兵單致挫傷亡士卒二百
餘名譙賞謙收隊還靜甯臣宗棠得報立飭總兵劉明燈殷華廷
馬步兩營及臣宗棠親兵四哨由平原馳出靜甯並調陳湜駐固
原之果勇三營七成隊及馬隊兩起繼進劉明燈等行抵靜甯該
逆大股已望風而遁臣復飭陳湜所部暫駐靜甯飭劉明燈等率
隊由靜甯前進二十六日賊竄通渭屬之董義堡李耀南率所部
會虎威左營馬隊宗岳軍信義兩營步隊并會靜甯防勇馳出擊
之斬馘數百賊向秦安屬之蓮花城南趨楊世俊率所部馬步各
營由通渭縣出任當川二十八日楊世俊李耀南等躡至蓮花城
訶知賊眾麇集於邵家堡一帶距蓮花城僅二三十里二十九日

五鼓出隊勦之該逆偵知官軍追至列隊抗拒另伏馬步賊數百於李家川常家岔冀圖鈔截楊世俊等登高瞥見揮馬隊從邵家堡張兩翼將伏賊先行擊潰率步軍直擣其中血戰十餘合賊猶死拒不退哨官副將蔣昌品中槍陣亡朱克仁魯開貴身受槍傷適馬隊從左右馳鈔出賊後合勢圍殺賊眾駭奔馬步各隊乘勝追之沿途斬賊七八百名屍骸枕藉川水爲之不流賊之滾崖墜澗自相踐踏而死者復不下四五百人餘賊紛竄馬步官軍窮搜山谷斬賊又二百有奇是晚收隊隴城據生賊供此股由金積竄出疊經官軍擊敗餘黨與河州援賊合股商議同竄張家川頭目丁步月領員沙自元丁以全馮奇已於陣前伏誅馬阿渾劉阿渾及僞元帥伍老三沙成均已潛逃等語訊畢斬之閏十月初一日李耀南收隊回馬營監楊世俊等率隊出秦安追勦探得賊竄秦

州屬西北六十里鹽河城初二日追及鹽河城賊已竄西和屬之崔家磨孫寺灘鐵鑪坡一帶楊世俊乘夜襲之二更後銜枚疾走直薄賊壘初三日黎明四路馬步齊集該逆尙酣眠未覺官軍驟至先將崔家磨之賊圍殺淨盡而孫寺灘鐵鑪坡一帶村莊之賊聞信率黨蠡擁來援官軍隊伍如牆而進槍礮對轟斃悍賊數十哨官守備胡連陞中槍陣亡勇丁傷亡十餘名楊世俊督隊力戰賊勢仍卻官軍乘勝追之斃賊約四五百名餘賊向西和禮縣一帶四散狂奔復經漢中鎮總兵李輝武所部律勇前後兩營總兵邵永齡副將王光發迎勦於蔡家河地方斃賊數十餘賊數百名遁入南山一帶藏匿見飭各營按勦得旨仍著左宗棠等飭令各軍實力按勦務期淨絕根株○予甘肅陣亡副將蔣昌品祭葬世職○庚寅諭軍機大臣等御史李宏謨奏安徽廣德等州縣客民

屬集劫奪頻聞強占田宅並造有會館私藏軍器動輒聚眾地方官並不嚴辦江浙與皖南毗連處所客民亦復不少恐彼此煽惑爲患不可勝言請飭妥爲籌辦等語東南各省兵燹之後地曠人稀各處遣散游勇所在盤踞欺壓良民乘機滋事若不豫爲防範必致愈無忌憚著曾國藩張之萬英翰楊昌濬遴派明幹大員前往各該州縣認真體察情形分別良莠將安分守業之民量給荒田暫行耕種俾安生業其強橫不法之徒查明原籍遞回管束其實在無籍可歸者分別安置各州縣另編保甲收繳軍械責成該管道府隨時稽察儻敢滋生事端卽行嚴拏懲辦以靖地方原片著摘鈔給閱看將此各諭令知之○辛卯命張兆棟等會勘張秋築隄事宜○是月蠲緩直隸開州等八州縣被水新舊額賦雜課倉穀豐潤等七縣被水被旱新舊額賦倉穀晉州等四十三州縣

被擾節年額賦山東臨清等六十五州縣暨濟甯等四衛被水被旱被蟲新舊額賦雜課山西薩拉齊等五廳縣被水被旱被雹新舊額賦暨民借倉穀陝西吳堡縣被旱舊欠錢糧緩徵吉林甯古塔三姓琿春被旱新舊額賦安徽無爲等十六州縣被水被旱被風被蟲新舊額賦賑直隸開州等四州縣被水災民

十一月壬辰朔諭奕榕等嚴緝吉林馬賊○癸巳命鄭敦謹赴江甯會鞠張汶詳獄尋定讞汶詳伏誅○丙申出使法國欽差大臣崇厚奏報馳抵廣東省城卽於閏十月初十日放洋啟行報聞○丁酉諭軍機大臣等左宗棠穆圖善奏賊竄涼州鎮番派兵勦捕並續赴平番布置城防一摺甘肅古浪縣屬韓家莊堡有馬賊撲擾經副都統常明率隊擊退由裴家營東馬家磨溝竄出之賊復經都司尹天祥調營馳勦斃賊多名官兵撤出溝口被援賊圍裹

致副將謝元興等陣亡賊由土門擾及涼州圖攻郡城總兵王仁和督兵扼守賊向鎮番竄逸遊擊韓廷芝等各率兵勇迎擊斃賊甚夥餘賊奔往柳林湖一帶此股賊匪止有四五千名不難剿洗淨盡著左宗棠穆圖善嚴飭大靖土門各防軍會同涼州兵勇實力合剿務期一律芟除毋任延蔓至平番爲蘭垣西路咽喉深慮柳林湖踞匪及西甯撒回河州踞逆分途旁犯穆圖善親赴平番督飭副將鍾本起等扼紮營壘分布守禦並著飭令在防各營嚴密堵遏力固省防毋稍疏懈將此由五百里各諭令知之○廣江西廣信府學額五名臨江四名南康一名龍南縣十名貴溪安義進賢各九名上猶八名峽江萬安各四名湖南耒陽二名四川成都一名○予甘肅陣亡副將謝元興祭葬世職○己亥詔各省嚴禁關卡吏役需索○申諭各省整頓捕務○庚子諭軍機大臣等

蘇鳳文奏越南夷匪滋事情形暨防堵柳慶邊境勦捕武緣等處
伏莽各摺片越南賊匪襲踞浚台等處攻破木馬倉城及諒山夷
省兵貪班上巴通攔高平地方復有踞匪圖窺思陵等境匪勢如
此彼倡自應派兵堵勦蘇鳳文見已派令知府姚茂田統帶選字
四營馳出太平邊境協同徐延旭相機堵擊卽著飭令該員等迅
速嚴密扼勦毋令闖入內地以固疆圉廣東欽州轄境亦與該處
毗連並著瑞麟李福泰一體嚴防免致匪徒侵軼吳亞終一股甫
據蘇鳳文馮子材奏報全數蕩平越南地方安敕何以該處又有
此巨股肆擾恐仍係吳亞終餘黨暗長潛滋該撫等因前報肅清
此次遂託名於越南匪徒粉飾入告著蘇鳳文馮子材確切查明
據實具奏不准稍涉回護一面檄飭徐延旭等會同夷兵合力兜
擊務將此股賊匪悉數埽除馮子材本係辦理越南軍務尤不能

置身事外若以中國竄匪誘爲該國本有之賊聽其蹂躪殊非矜恤小邦之意著蘇鳳文馮子材悉心商酌設法剿洗不得稍存誘卸黔省苗匪不時竄擾粵邊柳慶邊防甚形喫重見在苗匪又有蠢動之信該撫已添派林字兩營助防慶遠檄令黃才貴等移紮葛諒以固柳州一路著卽嚴飭防軍及各該地方官認真防剿力行堅壁清野之法毋任該匪越境擄掠以遏賊氛武緣匪徒劉新城業已殲除積匪亦次第搜捕並將賓州廖八股匪巢穴攻毀惟南太泗鎮思恩等府距省較遠伏莽尤多仍著該撫飭屬分投剿洗庶免死灰復燃至桂林府所屬之永甯州三隍地方亦有積匪滋事雖已擒渠堵穴難保無零星逸匪四出逃匿並著蘇鳳文嚴飭該地方官實力搜捕毋任蔓延將此由五百里各諭令知之○

召蘇鳳文入覲以李福泰署廣西巡撫瑞麟兼署廣東巡撫

由兩廣總督

督○辛丑諭軍機大臣等劉崐奏援黔湘軍疊破賊寨克復台拱
廳城暨請飭川軍迅克清黃各摺片貴州苗匪麇集羊條各寨經
提督龔繼昌率隊進剿疊克堅巢席寶田會督諸軍乘勝進拔三
丙革夷等巢立將台拱廳城克復該城西南北三面賊壘以次鏟
除剿辦尙爲得手惟九股河深處數寨賊匪尙多高坡雞擺尾等
處仍有賊寨數十梗於台拱清江古州之間見雖有番招登裸等
寨來營乞降席寶田已派員分往撫定仍當將各處著名逆匪殲
除淨盡方能剿撫兼施著劉崐檄飭席寶田迅將九股河之台生
養開等寨次第削平卽進軍將高坡等處苗寨分別剿辦以期清
江台拱一律肅清所有先後克復各城必須將善後妥爲籌辦始
能步步進紮劉崐仍當飭令各軍一面派隊將甕谷隴黃飄一帶
迅圖剿洗周達武一軍計已入黔著崇實吳棠飭令該提督迅將

清黃剋期收復冀與楚軍聲勢聯絡麻哈都勻兩城爲逆苗仰食之地著曾璧光卽派黔軍迅將該城收復扼要紮守遙爲楚軍聲援卽以自固疆圉毋得專恃鄰兵意存諉卸將此由五百里各諭令知之○以湖南官軍克復貴州台拱廳城賞提督龔繼昌唐本有黃馬褂餘加銜升敘有差予陣亡參將宋兆雲等十三員祭葬世職加等○壬寅諭軍機大臣等張廷岳阿爾塔什達奏籌防事宜並繪圖呈覽賊蹤西竄請飭堵截喀爾喀駝隻驟難籌撥各摺片據奏接到錦丕勒多爾濟函稱探聞賊匪已於十月二十三日西竄仍回肅州並探聞該參贊大臣已回烏城等語此股賊匪撲陷烏城僅畱四日卽行竄走口外地方遼闊難保不到處奔突見在賊蹤究往何處仍著張廷岳阿爾塔什達確探具奏宣化大同官兵已先後奏報起程張廷岳等置辦穹廬四百架所籌甚妥該

官兵到庫後仍應擇要分紮以固邊圉不得以匪蹤漸遠稍涉大意錦丕勒多爾濟自奏報烏城失守後迄今尙未續有奏報該參贊大臣旣回烏城著卽將該城將軍等下落及賊匪竄向何處詳細查明具奏並著將烏城所屬臺站趕緊整飭以通臺路其烏城所屬地勢並臺站道里仍著繪圖貼說詳悉奏聞見調赴烏城之兵有吉林黑龍江二千名察哈爾馬隊一千名又貢果爾帶察哈爾親軍馬隊二百五十名統歸杜嘎爾調遣到烏後著錦丕勒多爾濟會同杜嘎爾妥籌布置該參贊並應將所屬喀爾喀各盟蒙古官兵設法整頓隨時操練以固邊防賊匪雖有回竄肅州之信而沿邊各口皆可回竄著左宗棠穆圖善定安金順成祿於肅州甯夏及綏遠城一帶分投偵探遇有賊股陸續回竄卽行派兵設法兜剿務須就地殄滅毋再任令竄出邊外致剿辦轉形棘手烏

城之賊雖已退去或在附近地方暫時伏匿乘機仍肆竄擾亦未可定所有調赴烏庫之察哈爾吉林黑龍江馬隊及宣化大同官兵仍應迅速分別前往昨據李鴻章奏已派員籌設糧臺所有採辦糧食分給軍火及沿途轉運等事著李鴻章文盛杜嘎爾錦丕勒多爾濟張廷岳阿爾塔什達仍遵昨日諭旨分別妥籌具奏大同官兵所需糧餉軍火何璟亦當源源應付均毋任稍有缺乏定安前派參領貢果爾統帶察哈爾馬隊二百五十名赴哈爾尼敦推河一帶探蹤截剿刻下諒早起程此項馬隊本歸杜嘎爾調遣著卽飭令與達爾濟所部合兵一處相機探剿毋稍遲延劉銘傳何日到陝著定安咨照該提督迅速撥兵前赴纏金屯紮其富勒琿所部吉林黑龍江馬隊一千二百名暫緩起程仍紮原處會同防守聽候續有諭旨再行調往金順前請調撥喀爾喀駝隻據張

廷岳等奏見在籌辦征兵轉運駝隻已覺不敷實難再行籌撥等語金順需用駝隻前已由定安撥給二百五十隻見在喀爾喀既難籌解著金順咨商定安應如何通融應用之處妥籌辦理將此由六百里各諭令知之○乙巳諭軍機大臣等劉銘傳奏到陝日期暫難拔隊扼守纏金並請調李成先一軍仍歸北路各摺片前因烏城失陷當諭劉銘傳撥兵紮守纏金以便富勒琿統帶馬隊起程赴烏茲據奏稱纏金距陝較遠分兵不易轉運尤難請飭定安就近派隊扼守等語烏城竄匪據張廷岳等奏已於十月二十三日仍回肅州此時該提督兵勇既暫難撥赴纏金卽著定安仍遵前旨令富勒琿照舊實力嚴防仍著劉銘傳俟後隊入關餉項軍火運到後派撥得力隊伍前往纏金節節進剿並將應防應剿處所與定安蔣志章隨時會商妥籌布置甯靈一帶賊匪見被官

軍圍剿勢已窮蹙難保不以蒙古爲掠食之地劉銘傳請令駐紮
潼關之李成先一軍調回北路所轄亦是卽著李鶴年飭令李成
先統率所部移赴北路照舊歸宋慶調遣以厚兵力劉銘傳於疏
通北山後卽駐兵定靖俟山西河防較鬆卽咨商宋慶以包頭爲
老營會合定安馬隊爲蒙古遊擊之師遏賊東竄將此由五百里
各諭令知之○丁未諭軍機大臣等兵部奏請飭各省督撫及各
路統兵大臣依限咨報兵勇數目並請飭各省將兵丁數目按年
題報各摺片同治元年十一月間曾經諭令各省督撫及各路統
兵大臣將存營出師各兵數按限造報並將軍營徵調兵勇名數
及隨時有無增減限三箇月咨報一次茲據兵部奏稱各省兵勇
數目有始則按限咨報繼則並未依限造送或有咨報一二次後
又不續報目有一次未報者其兵丁數目除湖北四川兩省依限

題報外其餘仍未按限題報屢經該部嚴催總未遵照辦理實屬任意玩延著各省督撫統兵大臣等奉到此旨後除以前未經造報兵勇各數無庸補報外即將見在所部兵勇數目仍按三箇月咨報一次以備稽覈儻再視爲具文卽著兵部嚴參至已造報各處仍著依限報部毋得先後參差以昭覈實其各省兵丁數目並著該督撫按年造冊題報不得再有耽延至軍興以來舍兵用勇本係權宜之計而勇丁遣撤易滋事端流弊日甚若不將綠營及早整飭致國家費千百萬帑項養之於平日不能用之於臨時身任封疆者問心何安見在甘肅滇黔各省軍務未靖我君臣臥薪嘗膽正宜力圖自強以期有備無患著各直省督撫將所管各營設法整頓限奉旨後六箇月將如何汰弱募強如何分日操練及各省可得有精銳士卒若干之處詳晰奏聞直隸天津江蘇上海

及劉銘傳軍營均練習槍隊礮隊步伐尙爲整齊號令尙爲嚴肅其教演之法著各該省自行咨取章程照辦總期實事求是變疲弱爲精強不得空言粉飾以致有名無實年來各督撫曾有裁兵增餉及酌調額兵訓練之奏然爲政不在多言而在實力奉行若以一奏塞責日久又漸形廢弛甚非朝廷倚任疆臣之意也將此各諭令知之○諭張廷岳阿爾塔什達奏籌撥馬匹以備官兵騎乘並探聞賊匪情形各摺片據稱赴援烏城之兵若繞由庫倫蘇木臺站行走中途未免濡滯不如由賽爾烏蘇向西由推河直抵烏城較爲便捷所籌尙合機宜張廷岳等見已札飭賽因諾顏部落盟長將推河以北至烏城十五臺趕緊設復著錦丕勒多爾濟一體札飭該盟長迅速辦理以通臺路賊匪尙在距烏城西南四五臺之雜普汗河地方盤踞此時援兵若能趕早前往正可出賊

不意擊其情歸達爾濟所帶察哈爾馬隊一千名計已起程著文盛杜嘎爾迅卽飭令由賽爾烏蘇向西探蹤截剿毋稍遲延貢果爾所帶察哈爾馬隊二百五十名著定安飭令探明達爾濟行抵何處卽行合隊進剿以資厚集張廷岳等所稱援兵出口若一路徑趨烏城轉向西南追剿一路由沙勒噶爾珠特推河向西北迎擊可期得手著杜嘎爾催齊吉林黑龍江馬隊統帶前進應如何與達爾濟分路進兵兩面夾擊之處妥商辦理張廷岳等咨調烏城所屬官厰馬匹三千著錦丕勒多爾濟飭令如數挑選解至推河一帶牧放以備官兵進剿之用庫倫所屬東兩部落籌備馬二千一百匹情殷報效著張廷岳等驗收後卽行奏請獎敘以昭激勸宣化大同官兵行抵庫倫卽著妥爲布置以固邊防將此由六百里各諭令知之○戊申諭內閣福濟榮全奏回匪撲陷烏垣焚

掠遼颺自請治罪一摺據稱烏里雅蘇台於本年十月十九日突有賊匪千餘由東南西南山溝奔撲該城東西南三門經官軍擊退後賊仍抵死抗拒東溝復有續來賊隊數千蜂擁撲城四面放火蟻附而登城內城外官兵僅三百餘名力不能守賊匪遂肆焚掠於二十三日向西南竄出等語此次烏城被匪竄入福濟等既不能先事豫防臨時復不能力圖堵剿本當治以應得之罪姑念該城兵力甚單勢難堵禦尙屬可原福濟榮全錦丕勒多爾濟均著革職畱任以觀後效仍著督飭蒙古官兵及派往察哈爾吉林黑龍江等處馬隊迅將竄去賊匪悉數殲除毋畱餘孽○以兩江總督曾國藩充辦理通商事務大臣○庚戌左宗棠奏金積陝回餘黨會合河州援賊竄擾南路前經提督楊世俊等軍接仗大捷餘賊遁入南山邀脅各處回眾人數漸增臣宗棠飭總兵劉明燈

蕭賞謙殷華廷等督隊冒雪按山周開錫復派虎威中右親左馬步等營會剿十月十旬賊竄徽兩一帶駐徽縣兩當之提督胡國珍總兵蕭德林奮擊斃賊數百敗賊擾及石家灘等處漢中鎮李輝武調知豫伏所部於陝甘交界之鐵鋸梁山待之十七日賊越嶺而東南至半山李輝武揮軍從溝旁突出將賊截爲兩段賊棄騾馬翻山回竄李輝武縱兵追擊斬賊遂多生擒賊目趙福玉蘇咸喜官軍陣亡六名受傷三十名而已其後至之賊見前賊旣敗遂改道北竄方賊之渡渭而東南也劉明燈與殷華廷蕭賞謙及虎威營親左營營官總兵田連考副將謝復雲參將胡達萼等商議賊圖竄汧隴不得必仍北趨清水縣之張家川以是處爲撫回李得昌所居陝甘回民多僑寄其間足資容納也乃決計出清水趨長溝河度嶺而東先據隴境之若絲灣石莊子兩處扼險待之

比十八日馳抵若絲灣石莊子賊已竄至蘇家河矣距石莊僅三十里是夜三更劉明燈殷華廷蕭賞謙等由石莊子前進田連考謝復雲胡達蕐等及臣宗棠親兵四哨出隊由若絲灣前進十九日黎明會隊蘇家河賊方出谷南竄驍覲軍威驚懼失措劉明燈等奮威衝殺斬賊三百餘名餘賊翻山越境而逃官軍連夜躡蹤追擊復殺賊百餘名二十日收隊回秦安餘賊東西紛竄見兵卽逃復經總兵邵永齡副將王光發兩營由隴州西進截賊唐家河三角城等處斬賊二十餘名生擒六名陳湜所部三營及熊隆名馬隊由靜甯南進截賊喬家寨合水川等處斬賊五十餘名生擒四名總兵楊芳桂截賊安國鎮斬賊十餘名生擒二十六名其零星竄逸者臣等已嚴飭各營分途尋蹤掩捕并飭張家川已撫回民李得昌分別收輯矣又奏北路中路諸軍於金積堡鎖圍旣合

之後各將領抽派隊伍會攻隔河中洲之馬家河灘各堡比將各堡寨圍莊一律攻拔惟餘一大堡一小堡逐日猛撲迄今月餘尙未攻克緣地居河洲堡牆數重均係沙土築成不似甃石堅土易於著手地雷炸礮已轟坍堡牆數處而賊處必死之地心力易齊隨坍隨補依然如故見據劉錦棠黃鼎等稟堡中悍賊死傷山積所餘悍賊不過數百名諸軍晝夜環攻計可迅圖蕝事而將領受傷者已數十員名壯士之肉薄仰攻者亡傷已千數百計矣所幸將士一心誓必滅此朝食而援賊迄無消息似未敢東嚮以抗顏行攻拔之期或當不遠至金積堡賊自鎖圍既合之後堡外能戰者不過千餘老幼婦女五六千皆飢餓垂斃臣遣撫定陝回劉秉信赴劉錦棠黃鼎營壕引之出圍拔出二百餘名嗣是投出者絡繹不絕其壯丁甚有涕泣號救不得引領以待就戮者十三營同

目馬壽清卽普弭馬阿洪率其眷口投營臣已飭安插平涼矣前甯夏縣知縣彭慶章於同治四年陷入城中爲首逆馬化澂謀主見亦投入金運昌營臣飭提解平涼訊辦據生擒賊供堡內甘同守堡打仗者馬化澂每日每名給錢二千五百文僅能易麪一斤人多餓斃似賊中糧亦垂罄矣一俟馬家灘攻克諸軍當會攻王洪堡以圖金積上諭軍機大臣等金積堡陝回餘黨會合河州援賊由三甲集渡洮河竄擾柳林溝等處經官軍分投進攻斬馘甚多其渡渭而南之賊復經官兵躡蹤截擊殲除殆盡剿辦尙爲得手在事出力員弁准由左宗棠擇尤彙案保奏以示鼓勵其零星竄逸之匪著左宗棠督飭各營分途搜捕毋令死灰復燃蔣志章亦當會同劉銘傳檄飭各軍嚴密堵禦毋任闖入陝疆左宗棠一面飭令張家川已撫回民李得昌分別收輯以孤賊勢金積堡

合圖後逆情日形窮蹙著左宗棠嚴飭劉錦棠黃鼎等迅將馬家灘剋期攻拔以便各軍節節掃蕩會攻王洪堡以圖金積老巢爲堵穴擒渠之計至投出回匪絡繹不絕回目馬壽清亦率眷投營左宗棠已飭安插平涼惟該回眾是否真心反正尙未可知左宗棠務當隨時察看加意防維毋爲回眾所紿前甯夏縣知縣彭慶章甘心從逆爲馬化澂謀主見仍投入金運昌營著左宗棠卽飭將彭慶章解赴平涼嚴行訊辦毋稍寬縱將此由六百里各諭令知之○以甘肅總兵官周東興侵冒賑糧命於軍前正法○辛亥諭臣工力戒因循○甲寅督辦陝西軍務劉銘傳奏分撥隊伍扼要設防得旨著卽督飭各隊認真防堵毋稍疏懈北山伏莽尙多並著派得力隊伍實力接剿纏金一帶仍遵前旨派勇前往扼紮以厚兵力○乙卯諭軍機大臣等都興阿等奏查勘邊地情形一

摺據稱鳳巖二門邊地經該將軍等於本年十月間委員前往查勘接連春季所丈地界向東北一帶查辦續查出坐落多處已墾熟地十四萬餘畝見值天寒雪凍難以查丈各委員暫行回省請俟來歲春融再行接辦等語鳳巖邊地亟應趕緊勘定豈可年復一年耽延時日著都興阿額勒和布德椿於明春雪消時飭催該委員等趕緊出邊迅將鳳巖二邊切實通查完竣並將春閒查丈後被水衝淹地畝一併迅速查勘詳報不准稍事延宕將此各諭令知之○諭周達武奏籌議勦辦情形一摺前因唐炯一軍裁撤諭令貴州提督周達武迅速赴任接辦軍務見在該提督已抵貴州據稱所部兵勇僅五千九百人益以挑募唐炯舊部擬暫駐平甕然後整頓黔師次第肅清定廣等處會合楚師進擊等語卽著曾璧光周達武飭令帶兵各員認真扼守烏江北岸毋使苗匪得

援遵義府屬侵軼川邊以顧省北大道一面整頓黔師先清定廣
俟省門無警再由龍貴平甕兩路規取都勻以次由凱里八寨會
同楚師協力進剿至所請添募兵勇一節卽著周達武與曾璧光
妥爲籌畫該提督在川日久有無可調之兵諒所深悉或楚省勇
丁可以招募均著周達武分別咨商以助攻剿迅將黔省軍務認
眞整頓力除積習該提督以川省月協餉銀五萬八千兩一經添
軍不敷支放懇請寬籌餉項著戶部將各省協黔餉需先行分催
撥解俟曾璧光等商定添兵若干再行寬爲籌撥俾濟要需將此
由五百里諭知崇實吳棠劉岷曾璧光並傳諭周達武知之○丙
辰飭江浙兩省撥銀三十九萬餘兩織辦大婚綵紬○丁巳諭
軍機大臣等左宗棠穆圖善奏鎮番肅清附省兵團剿賊獲勝左
宗棠豫師奏派員統軍彈壓及籌布後路防剿事宜各一摺鎮番

踞匪經官軍擊敗全數西竄永昌穆圖善已飭總兵王仁和等跟蹤追勦務將此股賊匪悉數埽除毋令蔓延爲患如兵力不敷卽著左宗棠穆圖善酌度情形添兵前往援應皋蘭碾伯地方及省東轄境時有零星匪竄擾雖經兵團勦辦獲勝惟省垣根本重地逼近河狄該處賊股眾多深虞竄突見在河冰凍結尤應加意嚴防著穆圖善督飭兵團隨時偵探防勦毋稍疏虞左宗棠亦當妥籌兼顧金積堡賊勢已蹙何以日久未見成功糜餉老師該大臣難辭其咎若再不振刷精神迅圖攻拔致以一隅之地牽掣兵力耗費餉需大局何堪設想南路秦階一帶時有賊蹤該處統領能否得力河狄巨股如何設法進勦左宗棠當統籌全局迅將金積攻克騰出兵力次第廓清不得以遠在平涼僅顧甘北一路致軍務總未得手也豫師見已會商左宗棠將平番碾伯隘口布置嚴密

以杜西甯回眾由米拉三溝竄出之路先派總兵黃武賢馳赴威遠堡整頓各營西碾平番近旣安靖豫師當懷遵前旨馳赴本任會同黃武賢認真籌辦以重職守米拉溝窩藏陝回萬餘據豫師奏已分股竄赴甘涼一路著左宗棠穆圖善檄令甘涼防兵探明痛剿就地殲除毋畱餘孽將此由五百里各諭令知之○戊午諭軍機大臣等錦丕勒多爾濟奏擬帶蒙兵出境駐紮並請調員差委簡員管理孳生廠臺站事務文盛杜嘎爾奏遵飭馬隊陸續起程各摺片前因烏城被賊撲陷諭令錦丕勒多爾濟調集蒙兵力圖進剿見在賊旣退竄烏城商民漸集彈壓撫綏均關緊要錦丕勒多爾濟自應在城會同福濟榮全籌辦一切以定人心著卽折回烏城毋庸出境駐紮據奏賊向西南退去已過扎薩克圖汗部落刻下賊蹤究往何處仍著福濟等確切偵探具奏錦丕勒多爾

濟既回烏城所請調幫辦章京首得泰筆帖式成惠哈達哈三員如有應行差委之處卽著會商福濟等酌量調派其孳生廠及哈爾哈臺站事務緊要著派多布欽扎木楚桑噶西哩一併幫同錦丕勒多爾濟辦理此時內地援軍進發豫備駝馬整頓臺站均係刻不可緩仍著責成錦丕勒多爾濟會同籌辦不得以幫辦有人稍涉推諉文盛等見已飛咨達爾濟由賽爾烏蘇轉西前進察哈爾後起馬隊及貢果爾所部馬隊亦已定期起程著卽催令迅速進行黑龍江馬隊既經陸續抵宣卽著趕給駝隻飭令先行進發其宣大步隊卽飭隨後啟行並著杜嘎爾催齊吉林馬隊剋期統帶前往毋稍延緩推河迤北臺站著福濟等懍遵前旨趕緊設復並寬備駝馬及蒙古包薪水等項以便沿途支應援兵不至稍有阻滯福濟等俟援軍到後著卽會商布置探明賊蹤相機防剿並

派熟悉道路之嚮導官兵一同前進以資得力將此由六百里各諭令知之○已未諭軍機大臣等崇實吳棠奏通籌黔省全局事宜一摺據稱黔省軍務宜懲前此之失先清上游股匪改從都勻進兵若遽令周達武馳赴下游必致孤立無援等語昨因周達武馳赴貴州籌辦進剿並請添募兵勇當經諭令該提督與曾璧光妥爲籌畫貴州軍務日久未見起色曾璧光周達武亟應設法整頓和衷商辦期於實事求是豈可各存意見卽著該撫等按照崇實等所奏及貴州見在情形悉心籌畫妥爲布置以期迅掃賊氛早除民害儻因彼此意見兩歧致日久無功賊勢鴟張益甚恐曾璧光周達武不能當此重咎也將此由五百里諭知崇實吳棠曾璧光並傳諭周達武知之○庚申諭軍機大臣等何瑄奏探悉南北兩路軍情一摺據稱接據防堵奇台龍口山勇目鄧生玉稟報

南疆安集延率眾圍攻吐魯番屢將烏魯木齊赴援之賊擊敗並
據烏魯木齊南山圍練勇目徐學功稟報聚集民勇千餘與賊接
仗連勝擒斬逆首多名山後安集延酋長呼什伯克帶領所部回
眾圍困番城聲稱投誠報效徐學功已帶勇丁赴番會勦稟請大
軍西征擬調孔才一營前赴奇古俟成祿出關卽當親自帶兵會
同進剿收復各城等語回逆叛亂以來烏魯木齊各城久未收復
若如何瑄所奏是該逆已疊受圍勇懲創吐魯番又被安集延圍
攻機會大有可乘惟此等軍情何以不與伊勒屯列銜具奏至安
集延酋長投誠報效事難遽信恐係該回族等讎觸相爭欲借大
兵自圖報復卽如安得璘投誠之說至今未得確耗豈可輕率聽
信致爲所紿著文麟景廉伊勒屯確切查明如果各城賊勢窮蹙
逆黨內訌自屬機有可乘卽著確實偵探悉心酌度會商何瑄妥

爲籌辦何瑄仍不准單銜具奏以符體制孔才一營能否調赴奇
古駐紮著文麟景廉斟酌情形知照伊勒屯何瑄辦理將此由五
百里諭知文麟景廉伊勒屯並傳諭何瑄知之○諭曾國藩等勘
修蘇松水利○飭戶部籌撥科布多軍餉○是月蠲緩浙江海甯
等六十二州縣暨杭州衛被水本年額賦緩徵兩淮富安等十四場被水
十州縣暨岳州衛被水本年額賦緩徵兩淮富安等十四場被水
錢糧

十二月癸亥予湖南陣亡知縣魏承祝等建祠○甲子諭東河總
督嚴禁河工偷減侵蝕諸弊○丁卯諭軍機大臣等金順奏官軍
攻剿情形一摺王家疃踞匪疊經官軍痛剿外援已絕復經金順
會同張曜督飭各軍攻破外濠賊壘並先後開挖地道多處轟倒
礮樓寨牆殲賊多名惟因寨牆之內復有寨牆阻隔賊得憑牆拒

守我軍攻撲數次未能迅克著金順會商張曜督令各營奮力進攻迅將王家疇莊賊巢剋期攻拔不得遷延粉飾日久無功當此長圍已合金順等尤當嚴密防範毋任賊眾乘間竄逸甯夏城防亦應相機布置沙金托海一帶爲糧運要路著卽咨照劉廷協力防護毋令匪蹤滋擾將此由五百里諭令知之○予甘肅陣亡副將丁德西等祭葬世職○己巳諭軍機大臣等定安奏毅軍會擊回匪連獲勝仗一招陝回余彥祿等眾踞匿通昌騎賊竄及保豐一帶經提督劉廷派隊馳擊擒斬多名該提督卽會同金順所部各軍進剿通昌連獲勝仗見因各隊裹糧將完統軍暫回石觥此次余逆等眾雖經官軍擊敗仍未大受懲創通昌踞匪尙有二千餘人難保不乘虛竄擾石觥爲各軍屯糧之所尤關緊要著定安飭令劉廷一面將石觥磴口平羅等處嚴密防守以通糧運一面

勤加偵探遇賊卽擊務將此股賊匪悉數殲除毋畱餘孽將此由
五百里諭令知之○諭本年十月間突有賊匪四千餘名撲陷烏
里雅蘇臺據張廷岳等探明係屬肅州回股該匪徒見已沿途飽
掠仍回肅州若不將醜類悉數殲除大爲沿邊之患臺站遼闊賊
蹤來去自如本年春夏間時有零股竄擾察哈爾庫倫烏里雅蘇
臺之事至冬間竟成大股竄陷烏城是肅回出邊滋事者實繁有
徒肅州一帶賊巢正復不少成祿辦理肅州軍務未能一律肅清
以致匪徒充斥蹂躪地方亟應趁此賊股回巢痛加剿洗及早鏟
除儻任伏莽潛藏乘隙再逞必又掣動內地兵力成祿本令暫駐
關外就近兼顧肅州著卽振刷精神迅將該處賊巢掃除淨盡務
絕根株左宗棠亦當統籌全局撥兵會剿不准稍存膜視再據張
廷岳等奏探聞有賊千餘在烏喇特地方游弋圖擾甯夏糧道並

著左宗棠隨時知照定安金順勤加偵探妥爲防範將此由五百里各諭令知之○允張廷岳等奏於察哈爾烏里雅蘇臺所屬設立轉運糧臺○庚午諭內閣浙江學政徐樹銘奏採訪儒修各摺片覽其所奏請將已革翰林院編修俞樾賞還原銜交翰林院帶領引見聽候錄用署秀水縣學教諭譚廷獻等飭部卽選特予召試秀水縣舉人趙銘並江西拔貢生楊希閔等均比照博學宏詞及拔貢優貢朝考之例特予廷試各等語實堪詫異俞樾前於咸豐年間在河南學政任內因出題割裂荒謬已極奉旨革職之員何得擅請錄用至召試博學宏詞必須特旨舉行卽拔貢優貢朝考之例亦係國家定制非平空所能比擬徐樹銘輒爲俞樾乞恩意存嘗試並臚舉多人遽請特予廷試實屬私心自用謬妄糊塗所請均不准行徐樹銘著交部嚴加議處尋議降四級調用不

准抵銷從之○辛未諭軍機大臣等劉嶽昭岑毓英奏攻克鄧川
浪穹兩城並馬如龍傷痊進兵各摺片鄧川浪穹兩城久爲賊踞
經劉嶽昭等派令總兵楊玉科督兵進剿先將浪穹縣城攻克旋
卽分兵進攻鄧川立時克復並先後攻拔鳳羽白米莊長邑村鍊
鐵橋後各賊巢擒斬甚多勦辦尙爲得手楊玉科裹創力戰實屬
奮勉可嘉見在大理北路業已肅清賊勢愈孤著劉嶽昭岑毓英
飭令該總兵將收復地方分兵固守毋稍疏虞一面相度機宜穩
慎進取並著飭令李維述等合力攻剿以期擒穴擒渠早除巨患
馬如龍傷疾已痊見擬出省勦賊具見任事勇往著劉嶽昭等趕
緊籌給餉項俾得剋日起程將東溝等處賊巢迅籌掃蕩前據劉
嶽昭等奏澂江業已合圍近日攻剿情形若何卽飭岑毓英等力
圖攻克毋稍遲延將此由六百里各諭令知之○壬申諭軍機大

臣等成祿奏大隊暫駐高臺聽候諭旨暨甘涼賊股亟須剿辦山丹縣城被賊竄擾各摺片成祿所部頭起三營出關後始接據左宗棠來咨因將後隊暫停候旨刻下肅州一帶伏莽尙多必須悉數殲除免致延蔓成祿後隊既紮高臺正可督率各營就近接捕著懷遵本月初八日諭旨將肅州賊巢痛加剿洗盡絕根株涼州所屬之鎮番及甘郡城下均有賊股屯聚山丹高臺兩縣復有匪蹤尤須懾以兵力成祿後隊著卽駐紮高臺將關內附近地方隨時防剿以遏狂氛其頭起三營業已出關應否折回或卽在關外分紮著成祿妥爲調度至張掖等處運省倉糧前已准成祿提用著左宗棠飭令該地方官源源運濟毋令缺乏甘涼兩郡賊股已不下二三萬若不及早掃除必致四出爲患著左宗棠迅卽撥兵前赴甘涼一帶探蹤追剿以期西路肅清成祿請調吉林黑龍江

馬隊交常順統帶赴營前已未允所請仍著毋庸置議山丹被賊
闖入何以楊占鼐派防兵勇次日始入城堵剿署知縣張秉恬及
署提督楊占鼐貽誤情形著左宗棠查明具奏署遊擊孫啟後拒
賊身死並其餘各員下落著一併查奏原片著鈔給左宗棠閱看
成祿另片奏請赴海疆效力此時津案業經辦結所請著毋庸議
將此由五百里各諭令知之○予山東殉難州同周洛書等建祠
○癸酉命錦丕勒多爾濟整頓蒙古官兵赴烏城扼防○丙子諭
軍機大臣等戶部總理各國事務衙門奏廣東徵收洋藥正稅請
飭自行覈實辦理一摺據稱接據赫德申稱香澳併徵洋藥正稅
粵省既不承辦該省洋藥稅走私甚多擬在附近香澳等處設立
公所代關納稅已將巡查洋稅之輪船調赴廣東委副稅務司專
司其事每月需經費銀一萬兩年終計可多徵洋藥稅銀四五十

萬兩等語廣東洋藥稅偷漏甚多該省雖派有輪船查緝甚不足恃若謂徵稅不便於商情何以赫德獨能辦理使瑞麟等果能興利除弊則稅務自日有起色何至洋人越俎代謀據該稅務司所稱每年多徵之數可至四五十萬是已確有把握惟華商納稅係該省應辦事件地方官吏豈可置身事外著瑞麟崇禮按照赫德原申各節及戶部等衙門此次所奏卽於收釐處所帶收正稅由該督等自行商辦總在巡緝認真嚴防偷漏毋得任令委員蒙混以除從前積弊月需經費銀兩准由該督等自行覈定正稅按三十兩之數徵收仍於年終將總數報部惟利源所在見如自行商辦必實無走私偷漏情弊方爲覈實辦公不至爲洋人竊笑該督等務卽詳定章程斟酌妥辦不得稍事顛預亦不准稍涉推諉原摺著鈔給閱看將此由五百里諭知瑞麟並傳諭崇禮知之○諭

文盛杜嘎爾奏達爾濟一軍行抵賽爾烏蘇阻滯不能前進一摺據稱達爾濟一軍見已行抵賽爾烏蘇惟查推河等處臺站官兵寥寥無幾駝馬帳房等項數亦無多且管理五臺之台吉吹扎普等被警後迄未歸臺拜達拉克等十臺亦被賊擾又無氈房哈爾尼敦起至沙抄嘎勒卓特臺雖未被擾而積雪深厚生畜疲瘦大兵不能前進見飭該總管暫在賽爾烏蘇迤西各臺分隊駐紮豫備進發等語推河以北潰散各臺疊經諭令福濟等趕緊設復以利師行乃爲日已久而臺站仍未整頓實屬因循疲玩塞外風雪嚴寒糧食稀少儻分紮各軍因天寒餉缺或有譁潰之虞福濟等豈能當此重咎耶卽著該將軍等迅將哈爾尼敦等二十臺站應備駝隻薪水蒙古包等項無分晝夜趕緊一律豫備妥協並將援兵乘騎派員解赴經過各臺俾大軍得以遄行不至阻滯毋得再

有遲延自干罪戾文盛杜嘎爾仍當督飭達爾濟約束拊循設法相機前進並催後起各隊接續進發毋稍觀望前竄烏城賊匪首逆係何名姓見在究竄何處並著福濟等查明據實具奏將此由六百里各諭令知之○丁丑申諭整頓京城捕務○浙江巡撫楊昌濬奏浙省來歲新漕酌擬海運章程十四條一委員分辦以專責成一新漕仍由上海受兌放洋白糧仍循案裝盛麻袋首先運滬一寬備海運商船並由蘇多撥沙船移浙濟用一經耗等米仍照數支給商耗飭帶本邑並餘耗申糙等米搭運交倉一增給天津剝船耗米以彌虧欠一津通經費照案備帶釐羨等款仍按數抵解一商船准帶礮械並由商捐輪船護運仍責成沿海水師實力巡防一天津交米之後循舊責成經紀續到米船仍由天津道驗收一循案加增海運經費一米船到津應多添排數寬備剝船

一商船水腳等項照案覈給並二成免稅酌定賞罰一商船二成免稅之貨仍以米石計斤並船案跨帶竹木照案免稅一商船同空裝貨仍照向章免稅一米船抵津交卸嚴禁經紀斛斗刺船需索浮費下部知之○己卯左宗棠奏馬家河灘之賊經各軍更番痛剿劉錦棠等復增築礮臺偏之賊於堡內穴地而出夜襲礮臺又經提督蕭章開何作霖徐占彪等殲之臺下堡賊窘急乞降然令其繳械毀堡則仍疑懼不決閏十月二十二日據劉秉信引出之賊供稱陝回飢困日甚羣思冒險竄遁見官軍方聚攻馬家河灘金積東北壕牆之守必虛圖於夜間猛撲突圍而出劉錦棠黃鼎雷正綰金運昌徐文秀等會商初更抽隊潛伏牆內靜以待之夜半月上賊二三千由堡根潛趨東北直抵壕邊見牆上更鼓稀疏人語靜悄乃越壕攀堞而上官軍槍礮齊施開壁縱擊斃賊無

數賊敗歸巢黃鼎雷正綰徐文秀等復截之半途計共斬賊近千
名生擒二十餘名訊稱陝回馬大司已陣斃馬化澂之死黨譚生
成受槍子傷甚重劉錦棠旋於金積東門外搶紮兩壘併築礮臺
俯瞰賊巢黃鼎復擬抽隊偪紮西門賊益恟懼不知所爲嗣是堡
內堡外老弱婦女日詣劉秉信所駐壕外號呼救命慘不忍聞詢
知賊中惟馬化澂親屬及其死黨尙有存糧陝回之能戰及堡賊
之守壕者日給糧一斤近亦漸減此外皆以黍藎草根雜牛皮死
屍爲食首逆陳林情急因劉秉信求降於官軍劉錦棠黃鼎雷正
綰徐文秀姑漫應之十一月初十日陳林閭興春于兆林馬振江
金明堂馬化澂黑清全等挈老弱婦女八千餘赴黃鼎雷正綰營
外長壕跪求收撫自言易子析骸逃生無處之慘聲淚俱下且言
官軍如准收撫餘眾該頭目等死亦甘心劉錦棠黃鼎雷正綰徐

文秀等數其罪，譬令悉數呈繳馬械，聽候轉稟，撥其男丁分起安置各營。婦女則安置外壕之外，給以賑糧，聽候安插。馬化澄見官軍已撫陳林等，遂求陳林轉稟，撥馬家河灘糧三百石給壕外婦女求撤馬家河灘之圍。劉錦棠等許之，責令速繳馬械。即日自平堡牆聽令比因收繳馬械入堡檢視，見堡內之馬已悉數轟斃，殘賊穴地而居，以死馬雜衣被毡絮器物填塞，礮埒各口遮抵槍礮堡賊四五千存者，不過千餘精壯者，不過數百，然皆身無完膚也。仍令暫居故處十五日，馬化澄復求陳林轉稟，請平王洪堡堡目王洪前已伏誅，回民馬三仲王朋等自毀其堡，以堡眾降劉錦棠，收其馬械，亦令仍居故處。馬化澄料就撫之，必可無他也。十六日親身赴劉錦棠營壕外伏地叩頭，令隨行一人踰橋遞呈具言罪民所犯情罪，自知不赦，叩懇施恩。如蒙念族眾無辜者，多轉稟

曲宥僅以罪民一人抵罪死無所憾劉錦棠令開壁納之一面馳告雷正綰黃鼎金運昌徐文秀王衍慶等會商所以處之者諸將士怒其久抗顏行羣思縛而磔之以報私仇而雪公憤雷正綰黃鼎慰諭再三定議飛稟請示劉錦棠即寘馬化澂於幕旁派弁監護之一面飭馬化澂速繳槍礮器械壯丁不許持寸鐵自平堡寨牆垣地上不許畱坯土開造戶口名冊候示遵辦二十一日臣接來牘再四籌維西陲之不靖於今九年關隴諸回率視金積爲嚮背其狡謀兇餒實異尋常馬化澂非窮蹙至極必不輕冒鋒鏑以求生今既隻身來投並非誘致則操縱在我因而誅之不可謂武且馬化澂乞撫之詞顯欲一身塞咎市德諸回爲要結人心之計因而誅之亦且墮其術中比卽於來牘批示令馬化澂本堡馬械繳盡牆垣毀盡接辦河西王家疇通昌通貴各堡撫局再辦河州

西甯撫局如皆盡繳馬械盡平堡寨撫局有成再當具奏請旨陝
回陳林就撫後前竄河西余彥祿一股聞風而至盡繳馬械乞撫
劉錦棠等點驗人數約有千餘亦令造冊聽候安插余彥祿前此
帶傷未死驗視兩頰洞穿舌爛音澀亦垂斃矣統計陝回男婦大
小共一萬一千有奇老弱婦女九千名除馬長順一股數十名因
其眷口爲宋軍俘獲見尙畱昌貴二堡尋覓眷口外餘均分三起
解赴平涼聽候安插自此甯靈一帶無陝回蹤迹矣臣前於平涼
縣大岔溝那家溝北原安插陝回戶口數千給以賑種其餘荒絕
地畝雖多然不成片段又平涼係入甘肅大道居關隴之中北達
甯夏南通秦鳳東連涇原邠甯西趨金城湟中形勢最要不宜多
居種人勘得平涼華亭交界之化平川寬六七里長三十餘里窯
洞三百餘兼有破屋土沃水甘人迹斷絕可安插萬餘丁口近挑

已撫回民稍壯者百名裹糧前往稍加修葺俟各起回民解到卽量地居之給以賑糧種子牛騾農器督其耕墾所有建置經界規制禁令容臣就近察辦隨時陳奏其金積堡繳到馬械尙未據劉錦棠等冊報前來堡樓垛口均已平毀惟聞堡身堅厚異常兼值冰凝土凍程功未能迅速其散遣安插遷徙善後各事宜雖皆豫定規模而先後緩急之間審幾致決未可稍涉疏略臣軍總理營務布政使銜已革山西按察使陳湜膽智夙優兼有閱歷一切機要臣與密商均能體會臣已委其前赴金積堡會同劉錦棠黃鼎等妥爲籌策以冀萬全又奏關隴安危機括在金積金積克全局已在掌中兒在首逆就擒勒其繳械平堡而官軍鎖圍如故臣且時時申儆嚴禁擾掠嚴防鬆懈者慮其因勝而驕功敗垂成也馬化澂稔惡三世謀逆已久蓄機甚深縱有後效不蔽前辜暫若從

寬必滋後患臣早知爲國家必討之賊而此時議暫緩其誅者王家疇堡牆高厚存糧極多非猛攻所可驟得金積既克其勢已孤以馬化澂徇之宜可速下若先誅馬化澂同酋或懷疑懼必滯戎機王家疇一下通昌通貴自更無難料理至河州賊首馬占鼐早有就撫之意西甯賊首馬尕三自援金積敗歸後已略識兵威無能爲患尙非所急耳大約金積堡城平毀後宜先圖王家疇王家疇撫定後馬化澂及其父子兄弟親屬夥黨重者誅夷輕者遷徙乃收全功至馬化澂所以公爲戎首者以新敎惑眾斂錢以貿易經營致富又據金積堡膏腴之地侵占漢民產業富甲一方故蘊利生孽也臣見飭諸統領俟平毀堡城後凡馬化澂父子兄弟親屬財產均勒令悉數充公以之頒賞將士賑撫地方庶幾天理得人心順而國法亦伸矣又聞該逆於北省各口開設店鋪分布夥

友領本營運藉以探聽衙門消息交結同民洋商尤爲可駭臣自燕齊返旆而西張曜自豫入晉各省回商皆馳報陝回金積堡此其明徵臣擬俟諸務就緒後次第奏明辦理又奏總兵范銘所部多係河州狄道士著民人回亂以來流徙洮岷一帶歸總兵范銘統領甘肅所稱黑頭勇者也成軍之初旣未釐定營制又未限以額數不但老弱羸雜其間婦女親屬亦隨同聚處一人充當勇丁一戶卽藉以坐食始而派捐繼而按索民間不勝其擾而該軍勇丁仍苦一飽無時臣入關之初聞其能戰而騷擾特甚竊計不過與粵東惠潮勇丁習氣相同初不料其似此之甚也上年冬間范銘赴臣營求餉臣面詢情形深用詫異夫餉以養兵賑以救荒兩者本不相涉今藉餉以養災民並災民以充兵勇何以收餉節兵精之效況甘餉艱絀已極兵勇宜減不宜增賑務不可爲常百姓

宜歸隴畝萬無依傍營壘長爲乞丐之理當以此意諭知范銘令其速歸整頓挑選壯丁編成五百人一營約以數營爲度其餘則令安插墾荒由官給與賑糧籽種以規久遠時周開錫甫到臣營臣卽令向范銘詳爲開導酌給餉銀令其遵照辦理詎范銘爲所部蠱惑遲疑不決周開錫自抵甘南范銘迄不將該軍確數告知本年五月范銘所部守備何建威始於該軍內分出步隊五營馬隊一旗詣周開錫點驗周開錫立爲建字營隨同涼州鎮總兵傅先宗收復渭源狄道出力臣已隨摺請保何建威以遊擊補用以示優異冀范銘之有所觀感也旋據范銘稟知周開錫尙有正勇八營餘眾九營由岷州移紮南關坪每月按八營率取鹽菜按十七營支取口糧周開錫以狄道迤東一帶空虛令將餘眾分紮范銘迄不遵照分紮又因其浮冒口糧令造冊點驗亦迄不遵照造

冊點驗周開錫乃歷數其延誤違抗諸事實之范銘始親赴鞏昌
周開錫軍營謝罪並請以餘眾三營赴渭源聽點後又以各營官
不願分營爲詞迄不遵照該軍營務處都司王勇甚不義范銘所
爲獨率七百人至渭源受約束周開錫點驗後仍令其赴南關坪
盡將該軍所有餘眾調赴鞏昌立臨洮軍平西五營並檄范銘專
帶該軍正勇八營以分其勢王勇至南關坪范銘不欲其餘眾隸
之喉正勇各營與之列械私鬪王勇率餘眾二千餘還渭源後范
銘竟裹其正勇八營走官堡秀石關潰走岷州旋據署岷州知州
呂恕稟范銘到岷州後不知潛匿何處而其弟范銘及匪黨尤芝
政土匪案內漏網餘匪安桐貞常德鼈王玉麟胡玉升等代領其
眾復由岷州東出潰走焚掠村堡裹脅日眾周開錫令提督楊世
俊張仲春率馬步各營討之十一月初五日楊世俊率隊由禮縣

出石橋紅崖子遇潰卒於梁家寨奮威衝殺擒斬三四百名拔出
被裹難民千餘追殺二十餘里奪回被陷民堡十餘所初六日乘
勝躡追三十餘里沿途斬馘百餘名初八日楊世俊張仲春合隊
追勦初九日及於白家關而周開錫續派親兵營亦至接仗獲勝
擒斬二百餘名十一日追至岷屬苟家園潰卒一面乞撫一面列
隊扼紮官軍因奔馳果日未與交鋒十二日黎明潰卒分兩大支
馬步約六七千人踰嶺而來勢甚囂雜楊世俊等嚴陣待之俟其
氣稍衰馬步猛出奮擊酣戰兩時陣斬計七八百名潰卒大敗沿
途追斬五六百名解散脅從數百名勇丁傷亡八十餘名據生擒
潰卒供稱范銘避匿土司楊元地境叛弁安桐貞已於初五日之
戰礮傷左膝矣訊畢斬之潰卒敗竄岷州楊世俊等由禮縣拔營
追之因糧運不繼停待數日十九日抵岷州偏城而壘潰卒固匿

不出二十一夜楊世俊張仲春等督隊攻城火器環施將士更番
疊進前者顛墜而下後者猱升而上斃賊雖多而攻守勢殊卒未
得手宗岳營官管春林陣亡幫辦哨弁勇丁亡傷者約三百餘名
楊世俊肩臂均帶石傷幸不甚重天明仍收隊回營時前臺灣鎮
總兵劉明燈率所部一營及臣親兵四哨奉臣檄馳往會剿甫抵
禮縣周開錫聞楊世俊攻城未下傷亡頗多卽率駐輦之安營宗
岳仁營八成隊會傅先宗之馬隊由漳縣取道石關出梅川赴岷
并檄劉明燈由禮縣會師前進其敖天印王得勝梅開泰等亦以
從前太子寺之役范銘一軍首先潰退致掣大局此次該軍復敢
違令潰走咸懷不平請先討之以靖內患周開錫以范銘所部如
何建威王勇等十餘營自分撥成營後皆能殺賊立功是其軍將
士未嘗不可用也范銘棄軍走匿其下潰變或非其意所及惟尤

芝政安桐貞革挾制范銘迫脅勇丁情罪兇悖法在不赦應勘撫兼施迅圖藏事見尙未接其續報臣維隴事之壞在於從前餉事艱絀異常募勇徵兵日增一日不能立營制定餉章惟幸目前無事是非之不明威令之不行久矣故逆回而外土匪橫行潰軍疊起今欲轉弱爲強去冗雜而求精實開辦之始成效未著議論必多然臣不敢因此而有所撓惟當慎以圖之又奏記名提督丁賢發督帶宣威軍駐紮靈州屬之韋州堡紀律不嚴弁勇時多滋擾屢經臣嚴檄申飭並以危詞儆之該提督所部多江淮降人勇於戰鬪而習氣已深丁賢發恃勇而輕不加鈐束九月初間丁賢發帶隨身小隊赴豫望城因催辦運糧馱騾與豫望城回目馬添發爭辯盛詞詬責正紛呶間馬添發喉所管回眾與所部小隊搏鬪丁賢發拔刀而前砍傷數人觀者遽起立將丁賢發刺斃而隨行

之副將楊正華守備周炳南黃占標等亦以趨救丁賢發均受重創畢命先是萌城回目馬柏森經臣委帶旌善營馬隊豫望城歸提督周紹濂統領當馬添發等與丁賢發鬪殺馬柏森倉卒馳往彈壓事已無及而所部馬勇楊進海白有義楊進科楊春壯關漢英丁明有等又均馬添發親友及其舊管回民馬柏森無如之何旋帶其親信馬勇數名逸出馬添發既害丁賢發等欲勾馬柏森同變並戕其幕友典史黃元芳附生馬獻瑞以脅之而東山一帶零回多聞風響應臣據馬柏森及統領楚軍中路提督周紹濂統領奇營副四旗馬隊提督張會元等稟報前來當經飭令周紹濂差弁赴豫望城相機察辦檄令張會元暫行接統宣威軍並派副將李瑞林前往清點歸併爲之管帶又諭令馬柏森迅速設法縛馬添發楊進海等以獻維時東山各同有圖偪馬柏森以助逆者

有假旌善營號衣以劫擾糧道者適陝回丁步月等由金積南竄亦思踞豫望爲巢穴馬柏森所部馬勇馬彥龍等亦多被勾煽馬柏森潛告周紹濂豫爲之備一面收集部眾計擒馬添發等解交周紹濂並斬羅山郭家窩匪黨數十名捕獲譚家堡逆目譚生邦及馬忠海死黨丁發圖馬三保等解周紹濂營及臣營訊實斬決將丁賢發等屍骸禮殮送至韋州而兩月以來固原以北運道仍臻安謐 上諭軍機大臣等昨據李鶴年等奏有馬化澂自縛投誠之說當諭左宗棠察度賊情不可爲該逆所紿見在馬化澂遞呈乞撫懇求曲宥族眾僅以一人抵眾該大臣擬令馬化澂將本堡馬械呈繳牆垣平毀後接辦河西王家疇等堡撫局再辦河州西甯撫局軍情旦夕變遷朝廷亦不爲遙制惟馬化澂兇狡異常萬一收撫後又生反側竄入西路歸併河州賊黨逆餒復張彼時

墮其術中不但追悔無及且恐大局愈難收拾左宗棠務當通盤籌畫穩慎以圖不可稍涉疏虞貽後日無窮之患其收撫之陳林等並著妥爲安插毋令再滋事端所有在事出力之員弁兵勇著該大臣於事竣後奏請獎勵至陳湜一員到營未久此次金積堡將士尙未請獎若將陳湜先行開復殊不足以昭公允著俟續有勞績再行保奏總兵范銘違令潰走其弟范鎔及匪黨尤芝政等輒敢裹脅叛眾在岷州一帶焚掠雖經楊世俊等追斬多名而匪黨仍踞岷州著卽飭令周開錫等添派兵勇合力攻剿迅圖蕝事並著確查范銘避匿何處嚴拏懲辦其何建威等營仍當妥爲鈐束免滋他變提督丁賢發因催辦駝驢激變被戕罪犯馬添發等業經解營訊明正法駐紮預望城之馬柏森於丁賢發等之死雖救援不及惟罪犯均就殲滅功過尙足相抵著免其置議金積堡

馬械繳清堡寨平毀降眾如何安插該大臣應進紮何處次第撥
蕩均著妥籌具奏南路各軍該大臣倚周開錫調度一切務飭持
平妥辦毋任激生事端將此由六百里諭令知之○諭左宗棠密
陳馬化澂稔惡三世從寬必滋後患此時議暫緩其誅者以王家
瞳非猛攻所可驟得宜先圖王家瞳俟撫定後將馬化澂父子兄
弟親屬夥黨重者誅夷輕者遷徙等語所奏不爲無見若不照該
大臣所請恐於該處軍勢賊情不甚相宜馬化澂著暫緩正法俟
王家瞳等處就緒卽將該逆等分別重輕相機辦理屆時不得以
收復各處代爲乞恩以申國法而快人心至所稱該逆在北省各
口開設店鋪分布夥友探聽衙門消息足見黨與甚多應如何密
爲防範用靖奸宄並不動聲色藉安反側之處著左宗棠妥籌具
奏交結洋商一節是否僅爲購買外洋軍火等件抑另有句結重

情並著密訪奏聞○左宗棠奏前十月閒金積陝回餘黨會合河州援賊竄擾甘南時周開錫由鞏郡東赴伏羌就近調度豫傳鞏西各營嚴防河逆乘虛竄擾旋調知河州逆回馬步二千餘果渡洮東竄周開錫飛飭各營禦之十八日都司王勇徐承霖等率所部平西各營遇賊六七百名於鞏西三河口地方接戰獲勝斬賊二三百名訊之生賊知此股逆目爲河州下十會之馬悟眞是日提督王銘忠總兵敖天印副將張廷秀李文彪等各率所部護運大批糧料行抵狄東四十里鋪突遇騎賊百餘步賊千餘馳來王銘忠等分起一面護糧一面迎擊鏖戰一時斃賊數百賊竄狄城北壕適河州鎮總兵王得勝提督張明富梅開泰等率隊由南馳來傅先宗何建威率隊亦至各軍會合四面夾攻賊遂大敗何建威手擒馬悟眞斬之餘賊並無漏網報聞○予甘肅被戕副將楊

正華祭葬世職○撥山東司庫銀六萬兩充運河工需○乙酉諭
軍機大臣等前據張廷岳等探奏撲陷烏里雅蘇台賊匪係屬肅
州回匪見已沿途飽掠仍回肅州當諭成祿趁賊回巢痛加剿洗
並諭左宗棠撥兵會剿茲復據福濟榮全奏稱此股匪徒內有偽
元帥王大漢及馬瀝馬溶毛黃雷李四姓頭目裹脅甚夥實係甘
涼肅三處逆回自甘省額哲呢河土爾扈特貝勒旗竄入蹇因諾
顏部落等處攻陷烏城向西南颺去明春仍圖竄烏城東撲庫倫
等語肅州賊股成祿未能及早鏟除甘涼僻在西隅兵力單薄左
宗棠穆圖善均未顧及以致賊股充斥且又有米拉溝逃賊萬餘
竄往該處甯靈一帶昨據左宗棠奏已無陝回蹤迹難保非西竄
甘涼勾結滋事甘涼肅伏莽不除必致乘隙出邊擾亂臺站亟須
擊其情歸掃除巢穴著左宗棠穆圖善迅卽派撥兵勇馳往兜拏

務將甘涼肅一帶著名頭目悉數擒獲盡殲醜類毋任餘孽潛藏
致成延蔓並飭令各營嚴密扼駐斷賊出入要路成祿著懷遵前
旨就見有兵力勦辦肅州賊股不得置身事外自取愆尤將此由
五百里各諭令知之○允福濟等奏設烏城臺站駐班扎薩克四
員管臺台吉二員○予直隸陣亡從九品李萬倉祭葬世職江蘇
殉難知縣曾勉禮祭葬世職建祠○丙戌吏部等部議覆直隸總
督李鴻章條陳新設天津海關道定爲衝繁疲難四字最要之缺
由外揀員請補沿海地方均歸專轄直隸通省中外交涉事件統
歸管理兼令充直隸總督海防行營翼長並以天津府城未據險
要擬於五大河以北圍築新城以資備禦均應如所請辦理從之
○丁亥諭軍機大臣等庫克吉泰勦捕盜匪分別懲辦並擒獲續
起匪徒各摺片匪犯龐小禿勾結賊黨在朝陽縣屬之楊家店一

帶搶掠張中險等匪復在黑水轉山子等處勾結礦匪結會搶劫
先後經官軍擒獲要犯多名正法其龐小禿之姪龐三拐子復招
聚馬賊在混登營子地方滋事意圖報復亦經兵團剿捕將龐三
拐子等匪拏獲餘匪敗竄卽著庫克吉泰飭令帶兵各員會同地
方文武趕緊將逃逸各匪悉數弋獲不准一名漏網此次剿匪出
力員弁俟事竣後准其擇尤保奏毋許冒濫至設立練軍緝捕操
防均屬分內之事不得遽行奏請獎勵以示限制將此諭令知之
○以楊重雅爲甘肅按察使

前四川按察使

○戊子以裕祭太廟上

前期親詣行禮○庚寅予福建殉難道員孔昭慈原籍建祠○是
月豁免陝西綏德等十九州縣被雹被旱被擾舊欠錢糧並緩徵
來年上下忙額賦豁除湖南敘浦縣被水衝沒民屯田地額賦蠲
免兩浙仁和等六場坍廢竈地本年額徵賦課蠲緩湖北荊門等

三十州縣及武昌等二衛被水新舊額賦陝西乾州等三十五州縣被災被擾舊欠額賦緩徵安徽壽州等三十八州縣被水被旱被風被蟲新舊額賦河南鄭州等七十一州廳縣被水被旱新舊額賦展緩山西太原等二縣被水新舊額賦○是歲朝鮮入貢○會計天下民穀數除奉天江蘇安徽福建雲南廣西陝西甘肅未經冊報外吉林等省通共大小男婦二萬六千八百四萬二千三百名口存倉米穀二百六十二萬七千九十八石二斗四升三合三勺